

# **TULAFONO TAU FAAOFI E TAOFIA AI FAIGA FAATERORISI 2014**

## **SAMOA**

Faamatalaga e Faamalamalama ai

### **Otootoga**

O lenei Tulafono Tau Faaofi, o le a soloia ai le Tulafono o le Puipuia ma le Taofiofia o Faiga Faatupu Faalavelave 2002 ma faataunuu ai le faatinoga o Feagaiga ma Iugafono a le Fono a Malo Aafaatasi mo Puipuiga o le Saogalemu (e pei ona tusia i totonu o Faamatalaga) i le feagai ai ma faiga faaterorisi.

Ua aiaia ai foi i le Tulafono Tau Faaofi ni soligatulafono ma faasalaga e faasino i le aveina faamalosia faasolitulafono o se vaalele, sui sooupu aloaia faava o malo, tagata ua taofia faamalosi, felauaiga faasolitulafono o meafaitino faa-niukilia ma mea papa uga e lē faailogaina, solitulafono i malae vaalele, o vaa ma fausaga mausali, mea papa uga, faapaina o pomu e tagata terorisi, faatupeina o tagata terorisi, ma faiga faaterorisi e faaaogāina ai meatau faa-niukilia. O nei soligatulafono o lo atagia mai ai soligatulafono o lo o i lalo o Feagaiga taitasi o teena ai faiga faaterorisi, e aofia ai teuteuga ma maliega faa-feagaiga faaopopo i na Feagaiga.

O lo o i ai foi ni faasinomaga i totonu o le Tulafono Tau Faaofi, i aiaiga talafeagai i le Tulafono o le Ofisa o Tiute 1977 (e faasino i le faaulufaleina mai i totonu o le atunuu/auina atu i fafo o mea faaniukilia ma isi meafaitino), o le Tulafono o Vaalele Sivili 1998 (e tusa ai o malosiaga o se taitai-au o fua-vaalele ma puipuiga mo gaoioiga ua faia i le agaga lelei) ma le Tulafono o Tupe Maua Mai i Soligatulafono 2007, (e tusa ai o le puleaina o meatotino ma poloaiga e faoa faamalosia/taofia ai) ina ia faalatele atu ma faaaogā i aiaiga talafeagai o lenei Tulafono Tau Faaofi. Ua faapea foi ona faia o aiaiga mo le Vaega V (e faasino i vaega auai i se soligatulafono) o le Tulafono o Solitulafono 2013 ina ia faaaogā.

Ua faia foi se aiaiga i le Tulafono Tau Faaofi mo le puleaina, faoa faamalasia ma le taofia o meatotino faaterorisi ua masalomia. Ua aiaia ai foi ni malosiaga lautele e faasino i le felauaiga o meatotino faaterorisi, taofia o oloa o meatotino faaterorisi ua masalomia, faafesuaiga o faamatalaga e faasino i vaega ma gaoioiga faaterorisi, ma isi tulaga faapena.

O lo o i ai foi le aiaiga e faasino i moliaga faaletulafono ma le toe faafoiina o tagata terorisi o atunuu i fafo ua masalomia, ma puleaga faa-faamasinoga a faamasinoga a Samoa o lo o aofia ai ma atunuu i fafo.

E faaiu atu ai e faapea, ua aiaia i lenei Tulafono Tau Faaofi ni teuteuga faatupulaia i le Tulafono o Vaalele Sivili 1998 ma le Tulafono o Tupe Maua Mai i Soligatulafono 2007, ma tuuina atu ai se lisi fou o le faasologa o Feagaiga (o lo o i ai i le Faamatalaga 1) e faasino i faiga faaterorisi.

**Fuaiupu:**

**VAEGA I**  
**FAATOMUAGA**

- Fuaiupu 1:** - ua aiaia ai mo le igoa puupuu ma le amataga o le Tulafono.
- Fuaiupu 2:** - ua aiaia ai mo uiga o fuaitau o lo o faaogāina i le Tulafono.
- Fuaiupu 3:** - ua aiaia ai le uiga o “gaoioiga faaterorisi”.

**VAEGA II**  
**FAALAPOTOPOTOGA UA FAAMAOTIINA**

- Fuaiupu 4:** - ua faaalua manino ai le lisi o le faasologa o faalapotopotoga a Malo Aufaatasi ua avea o ni faalapotopotoga ua faamaotiina, ma e manaomia ai le Palemia ina ia faaavanoa i tagata lautele ni ata o lea lisi.

- Fuaiupu 5:** - ua aiaia ai e faapea e mafai e le Palemia ona faaaliga manino atu se vaega po o se tagata ua avea o se faalapotopotoga ua faamaotiina, ina ua maea ai ona feutagai ma le Loia Sili ma le Komesina o Leoleo. Ua manaomia foi i leni fuaiupu le Palemia na te tuuina atu o se faasilasilaga faalauaitele o le faia o sea faaaliga manino.
- Fuaiupu 6:** - ua aiaia ai e faapea o se faaaliga manino ua faia i lalo o le fuaiupu 5, e faatoa mafai lava ona suia pe faalēaogāina e le Palemia e pei ona ia manatu i ai, po o e pei ona talosagaina e le Loia Sili po o so o se faalapotopotoga ua faamaotiina. Ua manaomia foi le Palemia ina ia tuuina atu se faasilasilaga faalauaitele o sea suiga po o le faalēaogāina.
- Fuaiupu 7:** - ua aiaia ai mo le Loia Sili ina ia faia se iloiloga o se faaaliga manino ua faia i lalo o le fuaiupu 5 ma fuafua pe tataua ona faaauau sea tulaga; ae afai o le a lē manaomia le faaauauina o le faaaogāina o se faaaliga manino i lalo o le fuaiupu 5, e faia e le Loia Sili se talosaga i le Palemia e faalēaogāina ai le faaaliga manino.
- Fuaiupu 8:** - ua tuuina atu ai le aia tataua i se vaega o faalapotopotoga, po o se tagata (lea e noatia i se faaaliga manino ua faia i lalo o le fuaiupu 5) e talosaga ai i le Faamasinoga Sili ina ia suia po o le faalēaogāina o sea faaaliga manino. Afai ua faia le faaiuga a le Faamasinoga Sili e faalēaogāina pe suia se faaaliga manino, o sea faaiuga e ao ona lomua faasalalau.
- O leni foi fuaiupu ua tuuina atu ai le aia tataua i se faalapotopotoga ua faamaotiina ina ia talosaga i le Faamasinoga Sili mo se poloaiga e faapea, e le o se faalapotopotoga o lo o faasino i ai le fuaiupu 4.

- Fuaiupu 9:** - ua faatulaga atu ai le tualumaga lea e mafai ona faaogāina e le Faamasinoga e faasino i se faamasinoga i lalo o lenei Vaega.

### **VAEGA III** **SOLIGATULAFONO**

#### *Vaevaega 1 - Gaoioiga faaterorisi ma vaega terorisi*

- Fuaiupu 10:** - ua faia ai le soligatulafono ma le faasalaga o le faalafiina o se tagata ua faia se gaoioiga faaterorisi.
- Fuaiupu 11:** - ua faia ai le soligatulafono ma le faasalaga o le tuuina atu o auupega i se vaega terorisi.
- Fuaiupu 12:** - ua faia ai le soligatulafono ma le faasalaga o le auai i vaega terorisi.
- Fuaiupu 13:** - ua avea ai ma se soligatulafono se tagata, le faauluina o se isi tagata e avea o se sui auai o se vaega terorisi po o le auai ai i se gaoioiga faaterorisi. O le faasalaga o lenei soligatulafono o le nofosala lea i le falepuipui mo se vaitaimi e lē silia le 15 tausaga.
- Fuaiupu 14:** - ua faia ai le soligatulafono ma le faasalaga o le faapa pomu e tagata terorisi.
- Fuaiupu 15:** - ua faia ai le soligatulafono ma le faasalaga o taumafaiga faapa pomu a tagata terorisi.
- Fuaiupu 16:** - ua faia ai le soligatulafono ma le faasalaga o le auai i faiga faapa pomu a tagata terorisi.

#### *Vaevaega 2 - Ave faamalosi o tagata*

- Fuaiupu 17:** - ua faia ai le soligatulafono o le ave faamalosi o tagata. O le faasalaga o lenei soligatulafono o le nofosala i le

falepuipui mo se vaitaimi e lē silia le 15 tausaga.

- Fuaiupu 18:**
- ua faia ai le soligatulafono ma le faasalaga o taumafaiga e ave faamalosi tagata. O le faasalaga o lenei soligatulafono o le nofosala i le falepuipui mo se vaitaimi e lē silia le 12 tausaga.
  - ua faapea foi ona faia ai le soligatulafono ma le faasalaga o le auai e avea o se vaega auai i le tuufaatasia po o le faatonuina o isi e auai i, po o i so o se isi lava auala e lagolago ai i le faoa faamalosi, taofia po o le faamanualia ai o le tagata ua ave faamalosi.
  - ua toe faia ai le soligatulafono ma le faasalaga o le auai e avea o se vaega auai i le tuufaatasia po o le faatonuina o isi e auai i, po o i so o se isi lava auala e lagolago ai i le taumafaiga e faoa faamalosi, taofia po o le faamanualia o le tagata ua ave faamalosi.

*Vaevaega 3 - Solitulafono e faasaga  
i Tagata ua Puipuia Faava o Malo*

- Fuaiupu 19:**
- ua faia ai le soligatulafono ma le faasalaga o le fasioti tagata, pueina faamalosi po o le faaoolima po o le osofaia o se tagata ua puipuia faava o malo.

- Fuaiupu 20:**
- ua faia ai le soligatulafono ma le faasalaga o le ulufale faasolitulafono i nofoaga ma fale po o apitaga e lē faalauaitelaina po o auala o felauaiga o se tagata ua puipuia faava o malo.

- Fuaiupu 21:**
- ua faia ai le soligatulafono ma le faasalaga o taumafaiga po o le auai ai i se osofaiga faasaga i se tagata ua puipuia faava o malo.

- Fuaiupu 22:** - ua faia ai le soligatulafono ma le faasalaga o le tau faamatau e osofai po o le ulufale faasolitulafono i nofoaga ma fale o se tagata ua puipuia faava o malo.

*Vaevaega 4 - Faatupeina ma lagolago  
i gaoioiga faaterorisi*

- Fuaiupu 23:** - ua faia ai le soligatulafono ma le faasalaga o le faatupeina o faiga faaterorisi.

- Fuaiupu 24:** - ua faia ai le soligatulafono ma le faasalaga o taumafaiga e faatupeina ma lagolagoina gaoioiga faaterorisi.
- ua faapea foi ona faia ai le soligatulafono ma le faasalaga o le auai ai e avea o se vaega auai i le tuufaatasiga po o le faatonuina o isi e auai i, po o i so o se isi lava auala e lagolago ai i le tuuina atu po o le aoina mai o meatotino po o tupe e faatino ai gaoioiga faaterorisi po o mo le manuia o se faalapotopotoga ua faamaotiina.
  - ua toe faia ai le soligatulafono ma le faasalaga o le auai ai e avea o se vaega auai i le tuufaatasia po o le faatonuina o isi e auai i, po o i so o se isi lava auala e lagolago ai i le tuuina atu po o le aoina mai o meatotino po o tupe e faatino ai so o se isi lava gaoioiga faaterorisi e mafua ai le oti po o manuaga o le tino.
  - ua aiaia ai foi le soligatulafono ma le faasalaga o le auai ai e avea o se vaega auai i le tuufaatasia po o le faatonuina o isi e auai i, po o i so o se isi lava auala e lagolago ai i le tuuina atu po o le aoina mai o meatotino po o tupe e faatino ai so o se isi lava gaoioiga faaterorisi e mafua ai le oti po o manuaga o le tino.

- Fuaiupu 25:** - ua faia ai le soligatulafono ma le faasalaga o le tuuina atu o meatotino po o auunaga i se vaega terorisi.
- Fuaiupu 26:** - ua faia ai le soligatulafono ma le faasalaga o le tagofia o meatotino faaterorisi. O lo o i ai foi tuusaunoaga ua aiaia mo tulaga aliae mai lea e le o faia ai e se tagata se soligatulafono i lalo o lenei fuaiupu.

*Vaevaega 5 - Ave faamalosia  
faasolitulafono o se vaalele*

- Fuaiupu 27:** - ua faia ai soligatulafono o le ave faamalosia o se vaalele, taumafai e ave faamalosia ma le tau faamatau e ave faamalosia ma faasalaga e fesootai i ai.
- ua faia ai foi le soligatulafono ma le faasalaga o le auai e ave ma vaega auai i, le tuufaatasia po o le faatonuina o isi e auai i, po o i so o se isi lava auala e lagolago ai i le aveesea faamalosia po o le taumafai e aveesea faamalosia po o le faatino o le faatonutonuina o se vaalele (e ala i le faaogāina o le malosi).
- Fuaiupu 28:** - ua aiaia ai mo aiaiga i lalo o le Tulafono o Vaalele Sivili 1998 e faasino i malosiaga o se taitai-au o se fua-vaalele e faasino i aiaiga e fesootai ma le aveesea faamalosia o se vaalele i lalo o lenei Tulafono.

*Vaevaega 6 - Soligatulafono e aafia ai  
auupega faaniukilia ma isi meafaitino*

- Fuaiupu 29:** - ua faia ai soligatulafono ma faasalaga talafeagai o le felauaia faasolitulafono o meafaitino o auupega faaniukilia, ma le faia o se faamatalaga sese pe tau faasese ina ia maua mai ai le maliega a le Pule o le Tiute e faaulufale mai ai pe auina atu ai

i fafo po o isi felauaiga o meafaitino o auupega faaniukilia i totonu ma fafo atu o Samoa.

- Fuaiupu 30:**
- ua faia ai le soligatulafono ma le faasalaga o le mauaina, umia po o le faaaogāina ma isi auala faasolitulafono o meafaitino o auupega faaniukilia.
  - ua faapea foi ona faia ai soligatulafono ma faasalaga talafeagai o taumafaiga po o faiga tau faamatau e faia ai o faiga faaterorisi e faaaogāina ai auupega faaniukilia.

- Fuaiupu 31:**
- ua aiaia ai mo aiaiga i lalo o le Tulafono o le Ofisa o Tiute 1977 e faasino i oloa e faasaina le faaulufaleina mai i totonu ma auina atu i fafo o le atunuu (ae vagana ai mo faasalaga ma soligatulafono) e faaaogāina i le faaulufaleina mai ma le auina atu i fafo o meafaitino o auupega faaniukilia ua faasaina i lalo o lenei Tulafono.

*Vaevaega 7 - Feaveaia faasolitulafono o pomu palasitika matautia e lē faailogaina*

- Fuaiupu 32:**
- ua faia ai le soligatulafono ma le faasalaga o le gaosia faasolitulafono, umiaina, felauaia, ma le faaulufaleina mai i totonu, auina atu i fafo, faaaogāina po o le faaseseina o pomu palasitika matautia e lē faailogaina.

- Fuaiupu 33:**
- ua aiaia ai le malosiaga e ulufale atu ai se tagata ofisa ua faatagaina e le Komesina o Leoleo, e suesueina, asiasia faamaumauga po o le faia o ni ata mai se nofoaga po o fale ua masalomia o lo o gaosia ai, taofia, po o o lo o teuina ai mea papa matautia.
  - ua faapea foi ona faia ai le soligatulafono ma le faasalaga o le teena po o le faalavelaveina o se tagata ofisa faatagaina



ma le tuuina atu ma le iloa o faamatalaga sese po o le taofiofia o faamatalaga talafeagai o lo o manaomia i se suesuega.

*Vaevaega 8 - Solitulafono e faia i se malae vaalele*

- Fuaiupu 34:** - ua faia ai le soligatulafono ma le faasalaga o le faatinoga po o le tau faamatau i le faatinoga o se gaoioiga faatupu vevesi i se malae vaalele, po o le faatamaiaina po o le faaleagaina o nofoaga ma fale o se malae vaalele po o le faalavelave i galuega i se malae vaalele.
- Fuaiupu 35:** - ua faia ai le soligatulafono ma faasalaga o le taumafai e faatupu vevesi i se malae vaalele.

**VAEGA IV**

**SAOGALEMU O LE GATAIFALE**

- Fuaiupu 36:** - ua faia ai le soligatulafono ma faasalaga o le faoa faamalosia faasolitulafono o se vaa po o se fausaga mautu.
- Fuaiupu 37:** - ua faia ai se soligatulafono e se tagata na te faaaogāina faasolitulafono mea faaniukilia, vailaau faakemikale po o isi vailaau oona i luga o se vaa po o se fausaga mautu. O le faasalaga mo sea solitulafono ua faapena foi ona aiaia.
- Fuaiupu 38:** - ua aiaia ai le malosiaga e pueina faapagota ai se alii vaa o se vaa ua faamauina i Samoa e fesootai ma se tagata o ia lea ua ia faia se soligatulafono i lalo o le fuaiupu 36 ma le 37. Ua tuuina atu foi i le alii vaa le malosiaga e faaoo atu ai lena tagata i pulega talafeagai, ma e manaomia lona logoina atu o pulega talafeagai. O lena fuaiupu ua toe manaomia ai se leoleo na te auina atu i le falepuipui le tagata ua faaoo atu ia te ia,

peitai afai ua teena e lea leoleo ona faia o lea itu, e ao ia te ia ona tuuina atu mafuaaga tusitusia ua ia teena ai lea itu.

**VAEGA V**  
**PULEA MA LE FAOA FAAMALOSIA O MEATOTINO**  
**A FAALAPOTOPOTOGA UA FAAMAOTIINA**

- Fuaiupu 39:** - ua aiaia ai mo le Tulafono o Tupe Maua Mai i Soligatulafono 2007, ina ia faaogāina i le faoa faamalosia ma le taofia o meatotino a se faalapotopotoga ua faamaotiina ua taua i le fuaiupu 4.
- ua faapea foi ona aiaia ai mo meatotino ia o lo o noatia i se faatonuga a le Palemia, ina ia aveina i lalo o le vaavaaiga ma le faafoega a le Pule Faafoe e aunoa ma le faatuai po o se uluai faasilasilaga.
- Fuaiupu 40:** - ua aiaia ai mo le Palemia ina ia tofia ma faatonu (i se faiga tusitusia) le Pule Faafoe ina ia puipui ma taofia se meatotino faaterorisi ua masalomia, ma isi mataupu e faasino i sea faatonuga.
- Fuaiupu 41:** - ua manaomia ai le Palemia ina ia faia se lomiga faasalalau o se faatonuga ua faia i lalo o le fuaiupu 40, ma faapea e tusa lava pe e le o lomiga faasalalau se faatonuga a le Palemia, e tumau pea lona aloaia atoatoa faaletulafono.
- Fuaiupu 42:** - ua tuuina atu ai le pule faitalia i le Palemia e suia ai pe soloia se faatonuga ua faia i lalo o le fuaiupu 40, ma manaomia ai le lomiga faasalalau o lea lava tulaga e tusa ai ma le fuaiupu 41. O leni fuaiupu ua faapea foi ona aiaia ai mo le faamutaina o le aogā o se faatonuga e faasino i le meatotino (a se faalapotopotoga ua faamaotiina, po o meatotino ia e noatia i se poloaiga e faoa faamalosia ai ua faia i lalo o le fuaiupu 52).

- Fuaiupu 43:** - ua tuuina atu ai le aia tatau i so o se tagata o ia lea o lo o ia umia, po o ua tapaina se aia po o o lo o ia te ia le faafoega o le meatotino (lea o lo o noatia i se faatonuga a le Palemia i lalo o le fuaiupu 40) ina ia talosaga ai i le Faamasinoga Sili e suia po o le faalēaogāina o sea faatonuga. E mafai e le Faamasinoga Sili ona teena se talosaga po o le faalēaogāina o le faatonuga. Afai ua manatu le Faamasinoga Sili e soloia po o le suia o se faatonuga, o sea faatonuga e manaomia lona lomia faasalalau.
- O lenei foi fuaiupu ua tuuina atu ai i le Loia Sili po o so o se tagata (o lana meatotino lea e noatia i se faatonuga i lalo o le fuaiupu 40) se aia tatau e talosaga tetee ai e faasaga i se faaiuga ua faia e le Faamasinoga Sili i lalo o lenei fuaiupu. E faatoa mafai ona faia se iloiloga faa-faamasinoga ma se talosaga tetee pe afai e le o i ai i le Faamasinoga Sili po o le Faamasinoga o Talosaga (i lena faasologa) ni mafuaaga talafeagai e masalomia ai e faapea o le faalapotopotoga o se faalapotopotoga ua faamaotiina.
- Fuaiupu 44:** - ua faatulaga atu ai le tualumaga e talosaga ai mo le fofogaina o se mataupu i lalo o lenei Vaega.

#### **VAEGA VI**

#### **TAOFIA MA LE FAOA FAAMALOSIA O MEATOTINO FAATERORISI**

- Fuaiupu 45:** - ua aiaia ai mo aiaiga o le Tulafono o Tupe Maua Mai i Soligatulafono 2007 e faasino i poloaiga o le faoa faamalosia ma le taofia o meatotino (ae vagana ai faasalaga mo soligatulafono i lalo o lea

Tulafono) ina ia faaaogā i meatotino a se faalapotopotoga ua faamaotiina i lalo o le fuaiupu 4(2) po o ua faailoa manino mai i lalo o le fuaiupu 5, e faapei ai na faoa faamalosia po o ua noatia i se poloaiga e taofia ai i lalo o lea Tulafono.

**VAEGA VII**  
**MALOSIAGA LAUTELE**

- Fuaiupu 46:** - ua aiaia ai e faapea e mafai e se tagata ofisa faatagaina ona faataga le meatotino a se tagata lea ua ia masalomia i luga o se mafuaaga talafeagai o lo o faaaogāina e faia ai se soligatulafono i lalo o lenei Tulafono, ina ia faaulufaleina mai, tuua pe felauaia i totonu o Samoa.
- Fuaiupu 47:** - ua tuuina atu ai le pule faitalia i le Komesina o Leoleo e faailoaina atu ai po o le faasoaina o faamatalaga e faasino i vaega terrorisi ma gaoioiga faaterorisi, pe afai e le o faasaina i le tulafono ma (i le manatu o le Komesina) e lē afaina ai le saogalemu o le atunuu po o puipuiga o le saogalemu lautele.
- Fuaiupu 48:** - ua tuuina ai le malosiaga i se tagata ofisa faatagaina e faoa ai ma taofia oloa ua masalomia o ni meatotino faaterorisi.
- Fuaiupu 49:** - ua faatagaina ai se tagata ofisa faatagaina ina ia faaaogāina se malosiaga talafeagai e aveesea faamalosia po o le taofia ai o oloa i lalo o le fuaiupu 57. Ua manaomia ai foi se tagata ofisa faatagaina ina ia tuuina atu se faasilasilaga i le tagata lea ua aveesea faamalosia mai ai po o ua taofia mai ai ia oloa. Ua toe aiaia ai i lenei fuaiupu oloa ua taofia i lalo o le fuaiupu 57 ina ia aveina atu i se nofoaga malupuipua (e pei ona faatonuina ai e le tagata faatagaina).

- O lenei fuaiupu ua puipuia ai foi se tagata ofisa faatagaina po o se tagata fesoasoani faaletulafono i se tagata ofisa faatagaina mo le meatotino ua leiloa po o ua faaleagaina. Ua faalautele ai foi le faaaogāina o le Tulafono o le Ofisa o Tiute 1977, o le Tulafono o Puipuiga mai Tupe e Faaofi mai Faasolitulafono 2007 ma le Tulafono o Tupe Maua Mai i Soligatulafono 2007 e ui lava i lenei Vaega.

**Fuaiupu 50:** - ua manaomia ai se tagata ofisa faatagaina ina ia toe faafoi atu oloa sa aveesea faamalasia ma taofia i lalo o le fuaiupu 48, i le tagata lea sa aveesea faamalasia mai ai oloa, i se taimi vave lava e mafai ai ina ua maea le suesuega po o le faamutaina o le vaitaimi o suesuega. Ua aiaia ai foi i lenei fuaiupu se vaitaimi e fitu (7) aso (ma se faaopoopoga i lena vaitaimi) mo se suesuega e tusa ai o oloa ua aveesea faamalasia ma taofia i lalo o le fuaiupu 48.

**Fuaiupu 51:** - ua aiaia ai mo le faaopoopoga o le vaitaimi e fitu (7) aso i lalo o le fuaiupu 50, ma i lea faaopoopoga, e tatau ona faia se talosaga i le auala o lo o aiaia i totonu o lenei fuaiupu faatasi ai ma auililiga manaomia.

**Fuaiupu 52:** - ua aiaia ai mo le taofia o nisi oloa (ua taua, o oloa e faapea o se vaa, taavale po o se manu vaefa) ua taofia i lalo o le fuaiupu 48.

**Fuaiupu 53:** - ua faia ai isi soligatulafono e faasino i le taofia o oloa e pei o vaa, taavale po o manu vaefa. O nei soligatulafono o ni (i) gaoioiga ua lē usitaia ai so o se manaoga ua faaee atu i lalo o le fuaiupu 52(2) po o le (3); ma (ii) aveina po o le aveesea mai po o le faaliliuina atu o oloa i lalo o le fuaiupu 52 ina ia faaaogāina e lea tagata.

O le faasalaga mo le soligatulafono i totonu o le (i), o le nofosala i le falepuipui mo se vaiitami e lē silia le lima (5) tausaga ma se sala tupe e lē silia le 500 iunite tau faasalaga. O le faasalaga mo le soligatulafono i le (ii), o le nofosala i le falepuipui mo se vaiitami e lē silia le lima (5) tausaga, po o se sala tupe e lē silia le 500 iunite tau faasalaga, po o faasalaga uma e lua.

### **VAEGA VIII** **NOATAGA TAU SOLITULAFONO**

- Fuaiupu 54:** - ua aiaia ai mo le Vaega V o le Tulafono o Solitulafono 2013 e faaaogā i leni Tulafono.
- Fuaiupu 55:** - ua noatia ai se kamupani (e aofia ai se tagata faigaluega, sui sooupu po o se tagata ofisa) pe afai ua faamaonia lona nofosala i so o se soligatulafono i lalo o leni Tulafono, e faaopoopo atu i le noataga o so o se tagata mo lea lava soligatulafono.

### **VAEGA IX** **PUEINA FAAPAGOTA MA TOE FAAFOI ATU O TERORISI UA MASALOMIA MAI ATUNUU I FAFO**

- Fuaiupu 56:** - ua aiaia ai e faapea o leni Vaega ua faaaogāina e ui lava i aiaiga o le Tulafono o le Aumaia po o le Tuueseina Atu o Tagata Solitulafono 1974 po o so o se isi lava tulafono.
- Fuaiupu 57:** - ua mafai ai e se leoleo ona faaaogā le malosiaga talafeagai e pueina faapagota ai se terorisi masalomia mai fafo, ma aiaia ai foi mo le aveeseina atu o ia ituaiga tagata.

- Fuaiupu 58:** - ua manaomia ai le Minisita e nafa ma Faamasinoga ina ia tuuina atu se mataupu (e faasino i se terorisi masalomia mai fafo) i le Loia Sili mo se moliaga faaletulafono. Afai e leai se moliaga faaletulafono e faia mulimuli mai, e noatia le Minisita e nafa ma Faamasinoga ina ia aveeseina atu lea terorisi masalomia mai fafo.

### **VAEGA X**

#### **PULEAGA FAA-FAAMASINOGA**

- Fuaiupu 59:** - ua aiaia ai mo puleaga faa-faamasinoga a le Faamasinoga Sili a Samoa e aofia ai mataupu i fafo.
- Fuaiupu 60:** - ua aiaia ai mo tualumaga mo se soligatulafono ua faia i se nofoaga e ese mai i totonu po o luga ae o Samoa, ina ia faatoa faia i le i ai faatasi ma le maliega a le Loia Sili.


### **VAEGA XI**

#### **AIAIGA ESEESE**

- Fuaiupu 61:** - ua tuuina atu ai le malosiaga i le Kapeneta e faavae ai se Komiti mo faamoemoega o lenei Tulafono.
- Fuaiupu 62:** - ua tuuina atu ai le malosiaga i Le Ao o le Malo e faia ai tulafono faatonutonu, i luga o le fautuaga a le Kapeneta, e aofia ai ma le malosiaga e faaopoopo pe aveesea ai meataitasi i po o mai le Faamatalaga 1.
- Fuaiupu 63:** - ua soloia ai le Tulafono o le Puipuia ma le Taofiofia o Faiga Faatupu Faalavelave 2002 ma aiaia ai mo soloaiga ma mea faasaoina.

**Fuaiupu 64:** - ua aiaia ai mo teuteuga faatupulaia i le Tulafono o Vaalele Sivili 1998 ma le Tulafono o Tupe Maua Mai i Soligatulafono 2007.

**Faamatalaga 1:** - ua aiaia ai le lisi o le faasologa o feagaiga ma maliega tusitusia e taofia ai faiga faaterorisi mai le tausaga 1963 seia oo i le tausaga 2010.



.....  
(Hon SALA Fata Pinati)

**MINISITA O LEOLEO MA FALEPUPI**



**TULAFONO TAU FAAOFI E TAOFIA  
AI FAIGA FAATERORISI 2014**

**SAMOA**

Faatulagaina o Aiaiga

**VAEGA I  
FAATOMUAGA**

1. Igoa puupuu ma le amataga
2. Faamatalaina o uiga o upu
3. Faamatalaina o le uiga o gaoioiga faaterorisi

**VAEGA II  
FAALAPOTOPOTOGA  
UA FAAMAOTIINA**

4. Lisi tusia a Malo Aafaatasi o faalapotopotoga ua faamaotiina
5. Faaaliga manino o nisi faalapotopotoga e avea o faalapotopotoga ua faamaotiina
6. Suia po o le faalēaogāina o le faaaliga manino a le Palemia
7. Iloiloga o le faaaliga manino
8. Talosaga e faalēaogāina ai se faaaliga manino
9. Tualumaga

**VAEGA III  
SOLIGATULAFONO**

*Vaevaega 1 - Gaoioiga  
faaterorisi ma vaega terorisi*

10. Faalafiina o se tagata ua faia se gaoioiga faaterorisi
11. Tuuina atu o auupega i se vaega terorisi
12. Auai i se vaega terorisi
13. Faafaigaluegaina o se tagata e avea ma sui o se vaega terorisi po o le auai i se gaoioiga faaterorisi
14. Faapaina o pomu e terorisi
15. Taumafaiga a terorisi e faapaina pomu
16. Auai i faiga faapa pomu a terorisi ma le umiaina faasolitulafono o se mea papa matautia, ma isi tulaga faapena

*Vaevaega 2 - Ave  
faamalosia o tagata*

17. Ave faamalosia o tagata
18. Taumafai po o le auai i le taumafai e ave faamalosia

*Vaevaega 3 - Solitulafono e  
faasaga i Tagata ua Puipuia  
Faava o Malo*

19. Osofaiga e faasaga i se tagata ua puipuia faava o malo

20. Ulufale faasolitulafono i nofoaga ma fale o se tagata ua puipuia faava o malo
21. Taumafai po o le auai i se osofaiga faasaga i se tagata ua puipuia faava o malo
22. Tau faamatau i se osofaiga e faasaga i se tagata ua puipuia faava o malo

*Vaevaega 4 - Faatupeina ma lagolago i gaoioiga faaterorisi*

23. Faatupeina o gaoioiga faaterorisi
24. Taumafai, auai, ma isi tulaga faapena, i le faatupeina ma le lagolagoina o gaoioiga faaterorisi
25. Tuuina atu o meatotino po o auunaga i se vaega terorisi
26. Tagofiaina o meatotino faaterorisi

*Vaevaega 5 - Ave faamalosia faasolitulafono o se vaalele*

27. Ave faamalosia ma taumafaiga, ma isi tulaga faapena e ave faamalosia
28. Faaaogāina o le Tulafono o Vaalele Sivili 1998

*Vaevaega 6 - Soligatulafono e aafia ai auupega faaniukilia ma isi meafaitino*

29. Feaveaia faasolitulafono o meafaitino faaniukilia
30. O isi gaoioiga faasolitulafono e faasino i meafaitino faaniukilia, e aafia ai le taumafai, auai ma le tau faamatau
31. Faaaogāina o le Tulafono o le Ofisa o Tiute 1977

*Vaevaega 7 - Feaveaia faasolitulafono o pomu palasitika matautia e lē faailogaina*

32. Pomu palasitika matautia
33. Malosiaga e ulufale ai

*Vaevaega 8 - Solitulafono e faia i se malae vaalele*

34. Faiga faatupu vevesi i se malae vaalele
35. Taumafai e fai se gaoioiga faatupu vevesi i se malae vaalele

**VAEGA IV  
SAOGALEMU O LE  
GATAIFALE**

36. Faoa faamalosia o se vaa po o fausaga mautu
37. Faaaogāina o vailaau niukilia, kemikale po o isi vailaau oona i luga o se vaa po o fausaga mautu
38. Pueina faapagota ma le faaooina atu

**VAEGA V  
PULEA MA LE FAOA  
FAAMALOSIA O  
MEATOTINO A  
FAALAPOTOPOTOGA  
UA FAAMAOTIINA**

39. Faaaogāina o leni Vaega
40. Faatonuga e pulea ai meatotino
41. Faasilasilaga o le faatonuga
42. Fesuiaga, faalēaogāina, po o le faamutaina o le aogā o le faatonuga
43. E mafai e le Faamasinoga ona suia pe faalēaogāina faatonuga
44. Taulumaga

**VAEGA VI  
TAOFIA MA LE  
FAOA FAAMALOSIA O  
MEATOTINO FAATERORISI**

45. Faaaogāina o le Tulafono o Tupe Maua Mai i Soligatulafono 2007

**VAEGA VII  
MALOSIAGA LAUTELE**

46. Faatonutonuina o le faaooina atu o meatotino  
47. Fetufaaiga o faamatalaga e faasino i vaega terorisi ma gaioioiga faaterorisi  
48. Taofia o oloa ua masalomia o meatotino faaterorisi  
49. O isi aiaiga faaopoopo e uiga i le taofia o oloa i lalo o le fuaiupu 48  
50. Toe faafoiina atu o oloa na taofia i lalo o le fuaiupu 48  
51. Faaopoopoina o le vaiitaimi e 7 aso i le fuaiupu 50  
52. Puipuiga o nisi o oloa ua taofia i lalo o le fuaiupu 48  
53. Soligatulafono e faasino i nisi oloa ua taofia

**VAEGA VIII  
NOATAGA TAU  
SOLITULAFONO**

54. Faaaogāina o le Vaega V o le Tulafono o Solitulafono 2013  
55. Noataga o se kamupani

**VAEGA IX  
PUEINA FAAPAGOTA  
MA LE TOE FAAFOI ATU O  
TERORISI UA MASALOMIA  
MAI ATUNUU I FAFO**

56. Faaaogāina o leni Vaega  
57. Pueina faapagota ma le toe faafoi atu o se tagatanuu mai fafo ua masalomia  
58. Noataga e toe faafoi atu ai po o le molia faaletulafono

**VAEGA X  
PULEAGA FAA-  
FAAMASINOGA**

59. Puleaga faa-faamasinoga  
60. Maliega a le Loia Sili

**VAEGA XI  
AIAIGA ESEESE**

61. Malosiaga e faavaeina ai se Komiti  
62. Tulafono Faatonutonu  
63. Soloia, soloaiga ma aiaiga faasaoina  
64. Teuteuga faatupulaia

FAAMATALAGA 1

---

2014, Nu.

**O SE TULAFONO TAU FAAOFI UA TAU**

**O SE TULAFONO** e soloia ai le Tulafono o le Puipuia ma le Taofiofia o Faiga Faatupu Faalavelave 2002 ma faatino aloaia ai Iugafono ma Feagaiga a le Fono a Malo Afaatasi mo le Puipuiga o le Saogalemu i le feagai ai ma faiga faaterorisi.

**UA FAIA** e le Fono Aoao Faitulafono a Samoa i totonu o le Palemene ua potopoto e faapea:

**VAEGA I  
FAATOMUAGA**

**1. Igoa puupuu ma le amataga-**(1) E mafai ona taua lenei Tulafono o le Tulafono e Taofia ai Faiga Faaterorisi 2014.

(2) O lenei Tulafono e amata faamamaluina i le aso e tuuina i ai le maliega a Le Ao o le Malo.

**2. Faamatalaina o uiga o upu** - I totonu o lenei Tulafono, ae vagana ai ua manaomia e le mataupu se isi uiga e ese ai:

“gaoioiga faatupu vevesi” o lona uiga o so o se gaoioiga po o se gaoioiga ua lē faia, tusa lava pe ua faia i totonu po o fafo atu o Samoa ua faapea, afai ua faia, po o ua lē faia i totonu o Samoa, o le a faatulai mai ai se soligatulafono i lalo o le Tulafono o Solitulafono 2013, e aofia ai le manuaga i le tino, manuaga matuia i le tino, po o le faaooina faasolitulafono o le oti i so o se tagata;

“Pule Faafoe” e i ai lona uiga tutusa e pei ona taua ai i totonu o le Tulafono o Tupe Maua Mai i Soligatulafono 2007;

“vaalele” e i ai lona uiga tutusa e pei ona i ai i le Tulafono o Vaalele Sivili 1998;

“tagata ofisa faatagaina” o lona uiga:

(a) o se leoleo faipine o Galuega Tau Leoleo a Samoa; po o

(b) se Tagata Ofisa o le Matagaluega o Tiute; po o

(c) so o se isi tagata ua faatagaina i se faiga tusitusia e le Minisita e nafa ma Leoleo.

“Komesina” o lona uiga o le Komesina o Galuega Tau Leoleo a Samoa;

“atunuu o Malo o le Taupulega” e i ai lona uiga tutusa e pei ona taua i le Tulafono o le Aumaia po o le Tuueseina Atu o Tagata Solitulafono 1974;

“Feagaiga” o lona uiga o so o se Feagaiga ua tusia i le Faamatalaga 1, e faatatau i faiga faaterorisi;

“atunuu o le feagaiga” o lona uiga, mo le faamoemoe o le Vaega V o lenei Tulafono:

- (a) o se atunuu ua avea o se Malo Auai i le Feagaiga mo le Taofiofia o Gaoioiga Faasolitulafono e faasaga i le Saogalemu o Folauga i le Gataifale, na faia i Roma i le aso 10 o Mati 1988; ma
  - (b) o se atunuu lea o se Malo Auai i le Feagaiga i Tokyo.
- “Faamasinoga” o lona uiga o le Faamasinoga Sili a Samoa;
- “auupega faamiliteri ua faatagaina faaletulafono” e aofia ai, ae lē faatapulaaina i, atigi, pomu, fana pomu faatonutonu, maina, roketi, foliga eseese o mea faapa pomu, pomu-ati, auupega mo le faapuina o sima ma meafaitino malo ua gaosia faapitoa mo faamoemoega faamiliteri po o mo leoleo, e tusa ai o tulafono a Samoa;
- “faalapotopotoga” o lona uiga o se tagata, vaega, o se galuega tau atinae, mavaega tausī, faiga faapaaga, faaputugatupe po o se kamupani po o se faalapotopotoga ua tuufaatasia faaletulafono pe leai;
- “sone faapitoa tau le tamaoiga” e i ai lona uiga tutusa i lalo o le Tulafono o Sone Tau Folauga i le Sami 1999;
- “mea papa matautia” o lona uiga o oloa tau mea papa matautia, ua masani ona taua o “pomu palasitika matautia”, e aofia ai mea papa matautia e foliga i ituaiga pepa fesuisui ai po o le memei lo latou tino mai, e pei ona faamatalaina mai i le Pepa Faapipii o Meafaitino Faatekinisia i le Feagaiga o Pomu Palasitika Matautia;
- “mea papa matautia po o isi auupega matautia” o lona uiga:
- (a) o se mea papa matautia po o isi auupega po o masini e faapaina ua fausia po o e i ai lona malosiaga e faaoo ai le oti, manuaga matuia i le tino po o se faatamaiaga tele ogaoga; po o
  - (b) o se auupega po o se masini lea ua fausia po o e i ai lona malosiaga e faaoo ai le oti, manuaga matuia i le tino, faatamaiaga tele ogaoga e ala i le faasalalauina atu, faataapeina po o se aafiaga o vailaau oona, o elemeni faapaiolosi, mea oona po o isi vailaau oona tali tutusa po o aaveuila po o meafaitino o aaveuila malolosi.

- “fausaga mautu” o lona uiga o se motu fausia faafoliga, nofoaga faapipiina po o fausaga ua faatuina tumau i le alititai mo le faamoemoe o suesuega po o le faaaogāina o minerale aogā po o mo isi faamoemoga tau tamaoaiga;
- “atunuu i fafo” e i ai lona uiga tutusa i le Tulafono o le Aumaia po o le Tuueseina Atu o Tagata Solitulafono 1974;
- “poloai e faoa faamalosi ai” e i ai lona uiga tutusa i lalo o le Tulafono o Tupe Maua Mai i Soligatulafono 2007;
- “faaputugatupe” o lona uiga o ituaiga aseta taitasi uma, pe faitino pe leai, e mafai ona fesiitaia pe leai, pe na faapefea ona maua, ma pepa aloaia faaetulafono po o pepa faamaonia faaetulafono o so o se ituaiga, e aofia ai faiga faaeletoroni po o le faaaogāina o faiga faafuainumera, o lo o molimauina faamaonia ai le agavaa i po o le aia i ia aseta, e aofia ai ae lē faatapulaaina i tupe faaaitalafu i faletupe, siaki tupe a tagata malaga, siaki tupe a faletupe, tupe faapoloaiga, sea, faamalumaluga tau tupe, feaigaiga, pepa aloaia o siaki tupe ma tusi o aitalafu;
- “Malo o Samoa” o lona uiga o le Malo o le Atunuu Tutoatasi o Samoa;
- “nofoaga tau atinae tetele” o lona uiga o so o se nofoaga o lo o umia e le Malo po o le nofoaga umia tumaoti o lo o tuuina atu ai po o lo o faasoasoa atu ai auaunaga mo le manuia o tagata lautele e pei o le suavai, alavai o otaotavale, malosiaga faaeletise, suauu po o fesootaiga, ma gaoioiga tau tupe;
- “Lala Sooupu Faava o Malo o Malosiaga Faa-Atomika” o lona uiga o le lala sooupu a Malo Afaatasi sa faavaeina i le aso 29 o Iulai 1957 lea o lo o taumafai e uunaia le faaaogāina saogalemu o le malosiaga faaniukilia, ma ia tuutiitia mai lona faaaogāina i so o se faamoemoga faamiliteri, e aofia ai meatau niukilia, ma lipoti atu i le Fono Aoao a Malo Afaatasi faapea le Fono o le Puipuiga o le Saogalemu;

“felauaiga faava o malo o mea faaniukilia” o lona uiga o le feaveaia o se uta o meafaitino faaniukilia i so o se auala o felauaiga ua faamoemoe ina ia oo atu i fafo atu o le atunuu o le Malo lea e afua mai ai lea uta:

- (a) e amata mai i le tuua ai o le nofoaga o lē na auina mai lena uta i totonu o lea Atunuu; ma
- (b) e faaiu i le taunuu atu i le nofoaga o lē e mauaina lea uta i totonu o le Atunuu o le nofoaga mulimuli lea ua taunuu i ai.

“faalapotopotoga faava o malo” o lona uiga o so o se faalapotopotoga o se Atunuu po o se Malo o se Atunuu po o so o se lala po o se ofisa sooupu o so o se faalapotopotoga o lena ituaiga;

“tagata ua puipuia faava o malo” o lona uiga:

- (a) o Le Ao o le Malo (e aofia ai so o se sui auai o se ofisa o lo o faatinoina galuega tauave a Le Ao o le Malo i lalo o le faavae o le Malo ua faatatau i ai);
- (b) o se Faauluuluga o le Malo po o se Minisita e nafa ma mataupu tau le va i fafo, i so o se nofoaga lava o lo o i ai sea tagata i se Atunuu i fafo, e faapea foi ma ni tagata o lona aiga o lo o malaga faatasi ma ia;
- (c) so o se sui po o se sui aloaia o se Atunuu po o so o se tagata ofisa aloaia po o isi sui sooupu o se faalapotopotoga faava o malo e i ai matafaioi tau fesootaiga faava o malo, o ia lea, i le taimi ma se nofoaga sa faia ai se solitulafono e faasaga i lea tagata po o nofoaga ma fale aloaia, o lo o i ai lea tagata, o se fale apitaga faapitoa po o se auala tau femalagaaiga o lea tagata, ua agavaa ai i lalo o tulafono faava o malo i se puipuiga faapitoa mai so o se osofaiga o le saolotoga ma le tulaga aloaia o lea tagata, faapea foi i tagata o lona aiga o lo o avea ma lona auaga o lo o nonofo faatasi.

“gaosia” o lona uiga o so o se gaosiga, e aofia ai le toe gaosia, lea ua faia ai ni mea papa matautia;

“nofoaga tau niukilia” o lona uiga:

- (a) o so o se afi niukilia, e aofia ai afi ua faapipiina i vaa, taavale, vaalele (ua faaaogāina pe leai mo galuega faamiliteri, ofisa o tiute po o galuega tau leoleo) po o fausaga tau le vateatea ua faaaogāina e maua mai ai se malosiaga e mafai ai ona faagaoioia vaa, taavale, vaalele po o se meafaitino tau le vateatea mo so o se isi faamoemoe; po o
- (b) so o se masini po o se meafaigaluega e talafeagai ua faaaogāina mo le galueaina, teuina po o le gaosia po o le felauaia o meafaitino o aaveuila malolosi.

“meafaitino faaniukilia” o lona uiga o so o se mea ua taua e faapea:

- (a) plutonium o lo o i ai lona malosiaga faatupuina faalenatura (isotopic concentration) e lē silia le 80% i totonu o le plutonium-238;
- (b) uranium-233;
- (c) uranium o lo o i ai i totonu le uranium-233 po o le uranium-235 po o mea uma e lua;
- (d) uranium o lo o i ai faatasi ma le malosiaga faatupuina faalenatura (isotopic concentration), e ese mai i le uranium i le ituaiga o maa minerale po o toega o maa minerale;
- (e) so o se meafaitino o lo o aofia ai se tasi (1) po o le sili atu foi o mea ua taua muamua atu.

“Feagaiga o Meafaitino Faaniukilia” o lona uiga o le Feagaiga mo le Puipuiga o Meafaitino Faaniukilia, sa faia i Vienna ma Niu Ioka i le aso 3 o Mati 1980;

“nofoaga e faaaogāina e tagata lautele” o lona uiga o vaega o so o se fale, fanua, auala, alavai po o isi nofoaga ia ua avanoa ma tatala atu mo tagata lautele, tusa lava pe faaaauau, faavaitaimi, pe o nisi taimi pe leai, po o e tusa lava pe o lo o tofogi atu se tofogifuapauina pe leai po o se isi itu e ese mai ai ma ua aofia ai i totonu so o se nofoaga o fefaatauaiga faapisinisi, pisinisi, nofoaga faaleaganuu, talafaasolopito, faaleaoaoga, lotu,



faale-Malo, faafiafiaga, nofoaga mo le tapueina o le soifua laulelei po o nofoaga faapena e avanoa po o e tatala atu faapena i tagata lautele;

“pomu palasitika matautia” o lona uiga o se mea papa matautia e:

(a) fausia i le tasi (1) po o le sili atu o mea papa matautia malolosi e faapea o lo latou foliga manino atoa o lo o i ai le malosi o le asu e itiiti ifo i lo le 10-4 Pa i le fua o le vevela o le 25°C; ma

(b) ua fausia faatasi ma se meafaitino e fusia faatasi ai; ma

(c) afai e faafefiloi, suia ona foliga pe fesuisuia i le fua masani o le vevela o potu.

“Feagaiga o Pomu Palasitika Matautia” o lona uiga o le Feagaiga o le Faailogaina o Pomu Palasitika Matautia mo le Faamoemoe ina ia Faailoagofie ai, sa faia i Montreal i le aso 1 o Mati 1991;

“meatotino” e i ai lona uiga tutusa ua tuuina atu i le Tulafono o Tupe Maua Mai i Soligatulafono 2007;

“ala o felauaiga lautele” o lona uiga o nofoaga ma fale uma, felauaiga ma mea e faaaogā i ai, ua umia e le Malo po o tagata taitoatasi, o lo o faapea ona faaaogāina i totonu po o mo le faaaogāina lautele i auaunaga mo le felauaia o tagata po o uta oloa;

“auupega aaveuila malolosi” o lona uiga:

(a) o so o se auupega o mea papa matautia faaniukilia; po o

(b) o so o se meafaitino aaveuila malolosi e faataapeina po o se auupega e faasalalauina aaveuila lea e mafai, e tusa ai o lona malosiaga tau aaveuila malolosi, ona faaoo ai le oti, manuaga o le tino, po o se faatamaiaga tele o meatotino po o le siosiomaga.

“meafaitino o aaveuila malolosi” o lona uiga o se meafaitino faaniukilia ma isi vailaau aaveuila o lo o i ai niukilia ia e faafuaseia ona taape salalau (o se gaoioiga e faagaoioia faatasi ma le aave o uila maneta o se tasi (1) po o le sili atu o ituaiga o aaveuila ua liua e aveva o se atoma niii,

- e pei o le alpha-, beta-, vaega ninii faa-atomi e leai ni aaveuila, ma aave o le gamma) ma o lea ua mafai, e tusa ai o lo latou malosiaga o aaveuila po o totoga faaniukilia, e faapogai ai le oti, manuaga i le tino i tagata po o se faatamaiaga tele i meatotino po o le siosiomaga; “vaalele e pulea e Samoa” o lona uiga o se vaalele lea ua faamauina i totonu o Samoa;
- “Vaa” o lona uiga o so o se vaa o so o se ituaiga lava (e ese mai i se vaa-tau) e le o faapipiina tumau i le alititai, e aofia ai vaa o lo o faaaogāina ai ni malosiaga malolosi, vaa mau, po o so o se vaa e mafai ona faaopeopea;
- “faalapotopotoga ua faamaotiina” o lona uiga o se tagata po o se faalapotopotoga:
- (a) ua tusia e le Fono a Malo Afaatasi o le Puipuiga o le Saogalemu e pei ona faamatalaina atu i le fuaiupu 4; po o
- (b) lea ua faia ai se faaaliga manino i lalo o le fuaiupu 5.
- “nofoaga o le Atunuu po o le Malo” e aofia ai so o se nofoaga tumau pe leai po o se ala tau felauaiga o lo o faaaogāina po o o lo o nofoia e tagata o lo o avea ma sui o se Atunuu, sui o le Malo, o le fono faitulafono po o le ofisa o faamasinoga po o tagata ofisa po o tagata faigaluega o se Atunuu, po o so o se isi pulega a le Malo po o faalapotopotoga po o tagata faigaluega, po o tagata ofisa a se faalapotopotoga faava o malo e fesootai ma o latou tiute tauave aloaia;
- “gaoioiga faaterorisi” e i ai lona uiga ua tuuina atu i le fuaiupu 3;
- “vaega terorisi” o lona uiga:
- (a) o se faalapotopotoga o se tasi o ana gaoioiga po o faamoemoega, fuafuaga, galulue e faia, po o le faafaigofieina o le faia o se gaoioiga faaterorisi; po o
- (b) se faalapotopotoga ua faamaotiina.
- “meatotino faaterorisi” o lona uiga:
- (a) o se meatotino ua uma ona faaaogāina, o lo o faaaogāina po o o le a faaaogāina -
- (i) e faia ai se gaoioiga faaterorisi; po o
- (ii) e se vaega terorisi; po o

- (b) meatotino e umia po o e faatonutonuina, po o e maua mai po o e gaosia mai i se meatotino umia pe faatonutonuina e po o i le avea ai ma sui o se faalapotopotoga ua faamaotiina.
- “isi vaega auai” mo fuaiupu 17 e oo atu i le 18A, o lona uiga o se Atunuu, se faalapotopotoga po o se faalapotopotoga tau fesootaiga i le va o Malo po o so o se isi lava tagata;
- “Feagaiga i Tokyo” o lona uiga o le Feagaiga o Soligatulafono ma Nisi Gaoioiga ua Faia i Luga o Vaalele, sa faia i Tokyo i le aso 14 o Setema 1963;
- “auupega malolosi” e aofia ai se fana, ma se auupega tau vailaau kemikale, vailaau faapaiolosi po o auupega faaniukilia.

**3. Faamatalaina o le uiga o gaoioiga faaterorisi-(1) I totonu o lenei Tulafono, “gaoioiga faaterorisi” o lona uiga:**

(a) o se gaoioiga ua faia po o ua lē faia i totonu po o fafo atu o Samoa, e faapea -

(i) ua faia ai se soligatulafono i lalo o lenei Tulafono; po o

(ii) ua lamatia ai le ola o se tagata, le aloaia po o le saolotoga; po o

(iii) ua faapogai ai manuaga tuga po o le oti i se tagata po o so o se aofaiga po o se vaega o tagata; po o

(iv) ua tulai mai ai se lamatiaga matuia i le soifua maloloina po o le saogalemu o tagata lautele po o se vaega o tagata lautele; po o

(v) faapogai po o e faaono pogai mai ai se faatamaiaga i meatotino lautele po o meatotino a tagata taitoatasi, punaoa faalenatura, tau siosiomaga po o aganuu tuufaasolo; po o

(vi) e aofia ai le faaaogāina o auupega malolosi; po o

(vii) e aofia ai le faasalalauina atu i le siosiomaga po o le faataapeina atu po o le tatala faalauaitele atu o so o se:

(A) vailaau matautia, oona, aaveuila malolosi po o mea matautia; po o

(B) kemikale oona; po o

(C) vaega ninii po o vaega faapaiolosi po o mea oona; po o

(viii) e aofia ai le faaleagaina o so o se gaoioiga faatino po o le tuuina atu o ni auunaga e faasino tonu i galuega tetele talafeagai; ma

(ix) ua faamoemoe, po o, i lona natura masani ma lona uiga, ua talafeagai ina ia faatatauina mo se faamoemoe:

(A) e faamatau ai tagata lautele po o se vaega o tagata lautele; po o

(B) ina ia tauanau malosi ai se Malo po o se faalapotopotoga faava o malo ina ia faia po o le taofia o le faia, o so o se gaoioiga; po o

(b) so o se faalauiloaina, faatupeina, tuuina atu le lagolago i, faatonu, fesoasoani, faapogai, faamalosi, taumafaiga, tau faamatau, taupulepule, tuufaatasi po o le faaogaina o so o se tagata ina ia faia so o se gaoioiga ua taua mai i totonu o le parakalafa (a)(i) e oo i le (ix).

(2) O se gaoioiga ua faia po o ua lē faia ua taua mai i totonu o le faafuaiupu (1) e lē aofia ai se gaoioiga ua faia po o ua lē faia e faapea:

(a) ua faia e avea o se vaega e lagolago e faapogai, solo tetee, faatinoga tetee, fefinau ai ma solo tetee a tagata faigaluega ma e le o faamoemoe e oo atu i so o se mafatiaga ua taua mai i totonu o le faafuaiupu (1)(a)(i) e oo i le (ix); po o

(b) ua tulai mai se tulaga o se vevesi faaaupegaina ma i le taimi ma le nofoaga sa tupu ai, e tusa ai o tulafono faafoe o tulafono faava o malo talafeagai i lena vevesi.

**VAEGA II**  
**FAALAPOTOPOTOGA UA FAAMAOTIINA**

**4. Lisi tusia a Malo Afaatasi o faalapotopotoga ua faamaotiina-**(1) O se faalapotopotoga o lo o faasino i ai lenei fuaiupu, o se faalapotopotoga ua faamaotiina po o ua faatulagaina i lalo o le faafuaiupu (2) po o le (4).

(2) O faalapotopotoga ua tusia i le Lisi Tuufaatasia o Tagata Taitoatasi ma Faalapotopotoga e pulea po o e galulue faatasi ma Faalapotopotoga o le Taliban ma le Al-Qaida e pei ona faavaeina ma tusia e le Fono a Malo Afaatasi mo le Puipuiga o le Saogalemu ua faatatauina e avea o faalapotopotoga ua faamaotiina mai mo faamoemoega o lenei Tulafono.

(3) E ao i le Palemia ona faaavanoaina mo tagata lautele se Lisi Tuufaatasia pito i lata mai o Tagata Taitoatasi ma Faalapotopotoga e pulea e po o e galulue faatasi ma Faalapotopotoga a le Taliban ma le Al-Qaida.

(4) O se ata o le Lisi Tuufaatasia a Malo Afaatasi o faalapotopotoga faaterorisi ua saunia ma faamaonia e le Minisita e nafa ma Mataupu Tau le Va i Fafu, ua faatatauina lea o se uluai faamatalaga molimau e faapea, o le lisi o le lisi moni lea o faalapotopotoga ua faatulagaina mai e le Fono a Malo Afaatasi mo le Puipuiga o le Saogalemu ua avea o faalapotopotoga faaterorisi.

**5. Faaaliga manino o nisi faalapotopotoga e avea o faalapotopotoga ua faamaotiina-**(1) O lenei fuaiupu e faaaogā i se vaega po o se tagata e ese ai na i se faalapotopotoga lea e faasino i ai le fuaiupu 4.

(2) E tusa ai o se vaega po o se tagata lea e faasino i ai lenei fuaiupu, afai ua i ai mafuaaga talafeagai e talitonu ai le Palemia e faapea:

- (a) ua faia e le vaega po o le tagata, taumafai e faia, auai i le faia po o le faafaigofie le faia o se gaoioiga faaterorisi; po o
- (b) le vaega po o le tagata ua avea ma sui o, i le faatonuga a, po o i le galulue faatasi ai ma se vaega po o le tagata ua taua i le parakalafa (a); po o

(c) le vaega (e ese mai se tagata e toatasi) ua pulea atoatoa po o ua faatonutonuina atoatoa, i se auala tuusao pe leai foi e le vaega ua taua i le parakalafa (a) po o le (b),

e mafai e le Palemia i le maea ai ona fautuaina le Loia Sili ma le Komesina ona faailoa manino le vaega po o le tagata o se faalapotopotoga ua faamaotiina.

(3) E ao ona lomina faasalalau le faaaliga manino i lalo o le faafuaiupu (2), i le *Savali* (e aofia ai se tasi lava nusipepa o lo o faasalalauina i totonu o Samoa) i totonu o le tolu (3) aso talu ona faia.

**6. Suia po o le faalēaogāina o le faaaliga manino a le Palemia-**(1) E mafai e le Palemia, i luga o lana faitalia po o ina ua talosagaina e le Loia Sili i se faiga tusitusia, po o so o se faalapotopotoga ua faamaotiina, ona suia po o le faalēaogā se faaaliga manino ua faia i lalo o le fuaiupu 5.

(2) E ao i le faaaliga manino ua faia i lalo o le faafuaiupu (1) ona lomina faasalalau i le *Savali* (e aofia ai se tasi lava nusipepa o lo o faasalalauina i totonu o Samoa) i totonu o le tolu (3) aso talu ona faia.

**7. Iloiloga o le faaaliga manino-**(1) E ao i le Loia Sili, i so o se taimi e talafeagai ai, ona iloilo so o se faaaliga manino ua faia i lalo o le fuaiupu 5 ina ia fuafua ai pe tatau ona faaaauu pea ona faaaogā le faaaliga manino.

(2) Afai ua faia le faaiuga a le Loia Sili e faapea e leai ni mafuaaga talafeagai mo le faaaauu pea ona faaaogāina o se faaaliga manino i se faalapotopotoga ua faamaotiina, e ao i le Loia Sili, i se taimi vave lava e mafai ai ona faatino, ona faia se talosaga tusitusia i le Palemia mo le faalēaogāina o le faaaliga manino e faasino i le faalapotopotoga ua faamaotiina.

**8. Talosaga e faalēaogāina ai se faaaliga manino-**(1) E mafai e se faalapotopotoga po o se tagata lea e faasino i ai le fuaiupu 5 ona talosaga i le faamasinoga e faalēaogāina le faaaliga manino.

(2) E ao ona faaoo atu le talosaga i le Loia Sili.

(3) I le faia ai o le faaiuga o le talosaga, e mafai e le Faamasinoga ona:

(a) teena le talosaga pe afai ua faamalieina o ia o lo o i ai pea mataupu i le fuaiupu 5(2); po o

(b) le faalēaogāina o le faaaliga manino pe afai ua faamalieina o ia e faapea o lo o i ai mafuaaga talafeagai e faalēaogāina ai le faaaliga manino.

(4) Afai ua faalēaogāina e le Faamasinoga se faaaliga manino, e ao i le Loia Sili ona lomia faasalalau le faasalalau o le faalēaogāina i le Savali (e aofia ai se tasi lava nusipepa o lo o faasalalauina i totonu o Samoa).

(5) E mafai e se faalapotopotoga lea o lo o faasino i ai le fuaiupu 4 ona talosaga i le Faamasinoga mo se poloaiga e faaaliga manino ai e le o ia o se faalapotopotoga lea o lo o faasino i ai le fuaiupu 4.

(6) E ao i le talosaga o lo o taua i lalo o le faafuaiupu (5) ona faaooina atu i le Loia Sili ina ia auai ma fofogaina i ai le talosaga.

(7) I le iloiloina ai o le talosaga, e mafai e le Faamasinoga ona faia se poloaiga pe afai ua faamalieina e faapea e le o i ai ni mafuaaga talafeagai e talitonu ai e faapea, o lē na talosaga o se faalapotopotoga lea e faasino i ai le fuaiupu 4.

**9. Tualumaga-**(1) I luga o le fofogaina o se talosaga i lalo o le fuaiupu 8, e mafai e le Faamasinoga ona:

(a) talia e avea ma faamatalaga molimau so o se mea lea o le a lē taliaina ai i se isi faiga e ese ai e avea ma faamatalaga molimau (e aofia ai faamatalaga mai le Malo po o se faalapotopotoga tutoatasi po o se lala sooupu a se Malo mai fafo po o se faalapotopotoga faava o malo), lea e manatu le Faamasinoga e faatuatuaina ma talafeagai; ma

(b) tofia se *tagata faufautua a le faamasinoga* e fesoasoani i le Faamasinoga.

(2) E ao i le Faamasinoga, pe afai e faaogāina le faafuaiupu (1)(a), ona tuuina atu i le faalapotopotoga se faamatalaga tusitusia e ootoo ai le faamatalaga o i ai i le Faamasinoga, e

aunoa ma le faailoaina atu o so o se faamatalaga lea e manatu le Faamasinoga e mafai ona lepetia ai le puipuiga o le saogalemu o le atunuu po o e lamatia ai le saogalemu o so o se tagata.

### **VAEGA III SOLIGATULAFONO**

#### *Vaevaega I - Gaoioiga faaterorisi ma vaega terorisi*

**10. Faalafiina o se tagata ua faia se gaoioiga faaterorisi-**(1) Ua faia e se tagata se soligatulafono o ia lea ua ia faalafi, po o le nana, po o ua ia puipuia, taofia po o ua faalavelave i le pueina o so o se isi tagata, i le i ai o le mafuaaga e talitonuina ai e faapea o le isi lea tagata:

- (a) ua ia faia po o ua fuafua po o e na te faaono faia se gaoioiga faaterorisi; po o
- (b) o ia o se sui auai o se vaega terorisi.

(2) O se tagata o ia lea ua faamaonia i se soligatulafono i lalo o le faafuaiupu (1), e noatia e nofosala i le falepuipui mo se vaitaimi e lē silia le 15 tausaga.

**11. Tuuina atu o auupega i se vaega terorisi-**(1) Ua faia e se tagata se soligatulafono o ia lea na te tuuina atu po o ua ofo e tuuina atu se auupega i:

- (a) se vaega terorisi; po o
- (b) se sui auai o se vaega terorisi; po o
- (c) so o se isi lava tagata mo le faaaogāina e, po o mo le manuia o se vaega terorisi po o se sui auai o se vaega terorisi.

(2) E noatia se tagata ua faamaonia faaletulafono i se soligatulafono i lalo o le faafuaiupu (1), e nofosala i le falepuipui mo se vaitaimi e lē silia le 15 tausaga.

**12. Auai i se vaega terorisi-**(1) Ua faia se soligatulafono e se tagata o ia lea ua auai e avea o se sui, se sui e galulue faatasi, po o se sui ua faamoemoe e auai i se vaega terorisi lea ua i ai le mafuaaga e talitonuina ai o se vaega terorisi.



(2) E noatia se tagata ua faamaonia faaletulafono i se soligatulafono i lalo o le faafuaiupu (1) e nofosala i le falepuipui mo se vaitaimi e lē silia le 15 tausaga.

**13. Faafaigaluegaina o se tagata e avea ma sui o se vaega terorisi po o le auai i se gaoioiga faaterorisi-**(1) Ua faia e se tagata se soligatulafono o ia lea ua ia malie e faafaigaluega, po o e faafaigaluega se isi tagata:

- (a) ina ia avea ma sui o se vaega terorisi; po o
- (b) ia auai i le faia o se gaoioiga faaterorisi.

(2) E noatia se tagata ua faamaonia faaletulafono i se soligatulafono i lalo o le faafuaiupu (1), e nofosala i le falepuipui mo se vaitaimi e lē silia le 15 tausaga.

**14. Faapaina o pomu e terorisi-**(1) Ua faia e se tagata se soligatulafono o ia lea ua ia auina atu, tatao, faamatuu pe faapa se mea papa matautia po o se isi auupega matautia i totonu, po o e faasaga agai i se nofoaga faitele, se nofoaga po o fale o se Atunuu po o se Malo, se gaoioiga tau felauaiga lautele po o se nofoaga po o fale mo atinae tetele ina ia faaooina ai:

- (a) le oti; po o
- (b) manuaga i le tino; po o
- (c) faatamaiaga o lea nofoaga, fale po o gaoioiga; po o
- (d) vevesi lautele, fefe po o le atuatuvaile.

(2) O se tagata ua faamaonia faaletulafono i se soligatulafono i lalo:

- (a) o le faafuaiupu (1)(a), e ao ona faasalaina e nofosala i le falepuipui i le olaga atoa; po o
- (b) le faafuaiupu (1)(b), (c) po o le (d), e noatia e nofosala i le falepuipui mo se vaitaimi e lē silia le 15 tausaga.

**15. Taumafaiga a terorisi e faapaina pomu-**(1) Ua faia e se tagata se soligatulafono o ia lea ua ia auina atu, tatao, faamatuu pe faapa se mea papa matautia po o se isi auupega matautia i totonu po o le agai i totonu faasaga i se nofoaga faitele, se nofoaga po o fale o se Atunuu po o se Malo, se gaoioiga tau felauaiga lautele po o se nofoaga po o fale mo atinae tetele ina ia faaooina ai:

- (a) le oti; po o
- (b) manuaga i le tino; po o
- (c) faatamaiaga i sea nofoaga, fale po o gaoioiga; po o
- (d) vevesi lautele, fefe po o le atuatuvaale.

(2) O se tagata ua faamaonia faaletulafono i se soligatulafono i lalo:

- (a) o le faafuaiupu (1)(a), e noatia e nofosala i le falepuipui mo le olaga atoa; po o
- (b) le faafuaiupu (1)(b), (c) po o le (d), e noatia e nofosala i le falepuipui mo se vaitaimi e lē silia le 12 tausaga.

**16. Auai i faiga faapa pomu a terorisi ma le umiaina faasolitulafono o se mea papa matautia, ma isi tulaga faapena-**(1) Ua faia e se tagata se soligatulafono o ia lea ua auai

atu e avea o se vaega auai i, tuufaatasia po o le faatonuina o isi tagata e auai i, po o i so o se isi lava auala e lagolago ai i, le faaooina atu, tataoina, faamatuu pe faapaina se mea papa matautia po o isi auupega matautia i totonu po o e faasaga i se nofoaga faitele, se nofoaga po o fale o se Atunuu po o se Malo, se gaoioiga tau felauaiga lautele po o se nofoaga po o fale mo atinae tetele:

- (a) ua mafua ai -
  - (i) le oti; po o
  - (ii) manuaga i le tino, faatamaiaga o lea nofoaga, fale po o gaoioiga, po o se vevesi lautele, fefe po o le atuatuvaale; po o
- (b) ua mafua ai -
  - (i) le oti; po o
  - (ii) manuaga i le tino, faatamaiaga o lea nofoaga, fale po o gaoioiga, po o se vevesi lautele, fefe po o le atuatuvaale.

(2) O se tagata ua faamaonia faaletulafono i se soligatulafono i lalo o le:

- (a) faafuaiupu (1)(a)(i), e ao ona faasalaina e nofosala i le falepuipui mo le olaga atoa; po o
- (b) le faafuaiupu (1)(b)(i), e noatia e nofosala i le falepuipui mo le olaga atoa; po o

(c) le faafuaiupu (1)(a)(ii), e noatia e nofosala i le falepuipui mo se vaitaimi e lē silia le 15 tausaga; po o

(d) le faafuaiupu (1)(b)(ii), e noatia e nofosala i le falepuipui mo se vaitaimi e lē silia le 12 tausaga.

(3) I totonu o lenei fuaiupu, “auai” e aofia ai le felauaiga po o le feaveaia po o le tauaveina o se afifi, taga, pusa e teuina ai po o se mea o lo o aofia ai se mea papa matautia, po o isi auupega matautia po o se auupega.

(4) O le a avea o se puipuiga mo so o se tagata ua molia i lalo o lenei fuaiupu, le faamaonia atu i le Faamasinoga e faapea na te le i masalomia o lo o ia felauaia po o feaveaia se mea papa matautia po o se isi auupega matautia.

(5) O le faia ai o se soligatulafono i lalo o lenei fuaiupu po o le fuaiupu 14 po o le 15, aemaise lava pe afai na faamoemoe pe sa faatatauina ina ia faatupu ai le matau i tagata lautele po o, i se vaega o tagata po o ni tagata ua faamaotiina, e leai se faamaoniga i lalo o so o se tulaga aliae mai e ala i ni iloiloga faaupufai, tomai faapitoa faale-mafaufau, talitonuga faavae, lanu ma gagana, ituaiga tupuaga ma aganuu, po o isi itu e uiga tutusa.

(6) O se tagata o ia lea ua ia umia po o le taumafai e maua mai faasolitulafono se mea papa matautia po o isi auupega matautia e faia ai se soligatulafono i lalo o lenei fuaiupu po o le fuaiupu 14 po o le 15, ua ia faia se soligatulafono ma e noatia i luga o moliaga ua faamaonia faaetulafono, e nofosala i le falepuipui mo se vaitaimi e lē silia le 12 tausaga.

### *Vaevaega 2 - Ave faamalosia o tagata*

**17. Ave faamalosia o tagata-(1)** Ua faia e se tagata se soligatulafono o ia lea ua ia ave faamalosia, taofia po o le faamatau e fasiotia, faamanualia po o le faaauau e taofia faamalosi se isi tagata (“o le tagata ua ave faamalosi”) ina ia tauanauina malosi ai se isi vaega, ina ia faia po o le aloese mai le faia o se gaoioiga i se tulaga ua faamanino ai po o e faalilolilo ai le faasaolotoina o lea tagata ua ave faamalosia.

(2) O se tagata ua faamaonia faaletulafono i se soligatulafono i lalo o le faafuaiupu (1), e noatia e nofosala i le falepuipui mo se vaitaimi e lē silia le 15 tausaga.

**18. Taumafai po o le auai i le taumafai e ave faamalosia-**(1) Ua faia e se tagata se soligatulafono o ia lea ua taumafai e ave faamalosia, taofia po o le faamanualia, o le tagata ua ave faamalosia ina ia tauanauina malosi ai se isi vaega, ina ia faia po o le aloese mai i le faia o so o se gaoioiga i se tulaga manino pe faalilolilo mo le faasaolotoina o se tagata ua ave faamalosia.

(2) E noatia se tagata ua faamaonia faaletulafono i se soligatulafono i lalo o le faafuaiupu (1), e nofosala i le falepuipui mo se vaitaimi e lē silia le 12 tausaga.

(3) Ua faia e se tagata se soligatulafono o ia lea ua auai e avea o se vaega e, tuufaatasia po o le faatonuina o isi tagata e auai i, po o e lagolago i so o se isi lava auala i:

(a) le aveesea faamalosia, taofia po o le faamanualia o le tagata ua ave faamalosi; po o

(b) le taumafai e ave faamalosi, taofia po o le faamanualia o le tagata ua aveesea faamalosia, ina ia tauanauina malosi ai se isi vaega ina ia faia po o le aloese mai le faia o se gaoioiga manino pe faalilolilo mo le faasaolotoina o le tagata ua aveesea faamalosia.

(4) O se tagata ua faamaonia faaletulafono i se soligatulafono i lalo:

(a) o le faafuaiupu (3)(a), e noatia i luga o moliaga ua faamaonia faaletulafono e nofosala i le falepuipui mo se vaitaimi e lē silia le 15 tausaga; po o

(b) le faafuaiupu (3)(b), e noatia e nofosala i le falepuipui mo se vaitaimi e lē silia le 12 tausaga.

*Vaevaega 3 - Solitulafono e faasaga  
i Tagata ua Puipuia Faava o Malo*

**19. Osofaiga e faasaga i se tagata ua puipuia faava o malo-**(1) Ua faia e se tagata se soligatulafono o ia lea ua ia:

(a) fasiotia; po o

- (b) ua ave faagaoi; po o
- (c) ua faaoolima po o ua osofaia i se isi faiga e ese ai, se tagata ua puipuia faava o malo.
- (2) O se tagata ua faamaonia faaletulafono i se soligatulafono i lalo o:
  - (a) le faafuaiupu (1)(a), e ao ona faasalaina e nofosala i le falepuipui mo le olaga atoa; po o
  - (b) le faafuaiupu (1)(b) po o le (c), e noatia e nofosala i le falepuipui mo se vaitaimi e lē silia le 15 tausaga.

**20. Ulufale faasolitulafono i nofoaga ma fale o se tagata ua puipuia faava o malo-**(1) Ua faia se soligatulafono e se tagata o ia lea ua ulufale atu faasolitulafono i nofoaga ma fale aloaia po o apitaga e lē faalauaiteleina po o, auala o felauaiga o se tagata ua puipuia faava o malo ma le faamoemoe e faia se soligatulafono i lalo o lenei Tulafono, po o e aunoa ma se faamaoniga faaletulafono o lona i ai i lea nofoaga.

(2) E noatia se tagata ua faamaonia faaletulafono i se soligatulafono i lalo o le faafuaiupu (1), e nofosala i le falepuipui mo se vaitaimi e lē silia le tolu (3) tausaga.

**21. Taumafai po o le auai i se osofaiga faasaga i se tagata ua puipuia faava o malo-**(1) Ua faia e se tagata se soligatulafono o ia lea ua taumafai e:

- (a) fasiotia; po o
- (b) le ave faagaoi, faaoolima po o le osofaia, o se tagata ua puipuia faava o malo.
- (2) O se tagata ua faamaonia faaletulafono i se soligatulafono i lalo o:
  - (a) le faafuaiupu (1)(a), e noatia e nofosala i le falepuipui mo le olaga atoa; po o
  - (b) le faafuaiupu (1)(b), e noatia e nofosala i le falepuipui mo se vaitaimi e lē silia le 12 tausaga.
- (3) Ua faia e se tagata se soligatulafono o ia lea ua auai e avea o se vaega e, fuafuaina lelei po o le faatonuina o isi tagata e auai i, po o le lagolago i so o se isi auala i le:
  - (a) fasiotia; po o
  - (b) le ave faagaoi, faaoolima po o le osofaia; po o

- (c) le taumafai e fasioti; po o
  - (d) le taumafai e ave faagaoi, faaoolima po o osofaiga, faasaga i se tagata ua puipuia faava o malo.
- (4) O se tagata o ia lea ua faamaonia faaletulafono i se soligatulafono i lalo o:
- (a) le faafuaiupu (3)(a), e ao ona faasalaina e nofosala i le falepuipui mo le olaga atoa; po o
  - (b) le faafuaiupu (3)(c), e noatia e nofosala i le falepuipui mo le olaga atoa; po o
  - (c) le faafuaiupu (3)(b) po o le (d), e noatia e nofosala i le falepuipui mo se vaitaimi e lē silia le 12 tausaga.

**22. Tau faamatau i se osofaiga e faasaga i se tagata ua puipuia faava o malo-**(1) Ua faia e se tagata se soligatulafono o ia lea ua tau faamatau e faia se soligatulafono i lalo o le fuaiupu 19 po o le 20.

(2) E noatia se tagata ua faamaonia faaletulafono i se soligatulafono i lalo o le faafuaiupu (1), e nofosala i le falepuipui mo se vaitaimi e lē silia le lima (5) tausaga.

*Vaevaega 4 - Faatupeina ma  
lagolago i gaoioiga faaterorisi*

**23. Faatupeina o gaoioiga faaterorisi-**(1) Ua faia e se tagata se soligatulafono o ia lea ua ia tuuina atu pe aoina mai meatotino po o tupe:

- (a) e faia ai se gaoioiga faaterorisi po o mo le manuia o se faalapotopotoga ua faamaotiina; po o
  - (b) le faia o so o se isi lava gaoioiga e mafua ai -
    - (i) le oti; po o
    - (ii) manuaga o le tino,
- i so o se tagata e le o auai i vevesi e faaaogāina ai auupega, pe afai o se faamoemoega o sea gaoioiga, i lona natura masani po o lona uiga, o le tau faamatau lea i se faitau aofai o tagata, po o le tauanau malosi o se Malo po o se faalapotopotoga faava o malo ina ia faia pe aloese mai le faia o so o sea gaoioiga.
- (2) O se tagata ua faamaonia faaletulafono i se soligatulafono i lalo:

- (a) o le faafuaiupu (1)(b)(i), e ao ona faasalaina e nofosala i le falepuipui mo le olaga atoa; po o
- (b) le faafuaiupu (1)(a) po o le (b)(ii), e noatia i se sala tupe e lē silia le 1,000 iunite tau faasalaga po o le nofosala i le falepuipui mo se vaitaimi e lē silia le 15 tausaga, po o faasalaga uma e lua.

(3) I se moliaga mo se soligatulafono e faia faasaga i le faafuaiupu (1), e lē talafeagai mo le moliaga faaletulafono ona faamaonia e faapea, o le meatotino po o tupe ua aoina mai po o ua tuuina atu, sa faaogā moni lava, lona atoaga po o se vaega, i le faataunuuna o se gaoioiga faaterorisi.

(4) I totonu o lenei fuaiupu, “tuuina atu” po o “le aoina mai”, o lona uiga o le tuuina atu po o le aoina mai e ala i so o se faiga tuusao pe lē tuusao, tulaga atoatoa po o sona vaega.

**24. Taumafai, auai, ma isi tulaga faapena, i le faatupeina ma le lagolagoina o gaoioiga faaterorisi-**(1) Ua faia e se tagata se soligatulafono o ia lea ua taumafai e tuuina atu po o le aoina mai o so o se meatotino po o tupe:

- (a) e faia ai se gaoioiga faaterorisi po o mo le manuia o se faalapotopotoga ua faamaotiina; po o
- (b) le faia o so o se isi lava gaoioiga e mafua ai -
  - (i) le oti; po o
  - (ii) manuaga o le tino,

i so o se tagata e le o auai i vevesi e faaogāina ai auupega, pe afai o se faamoemoega o lea faiga i lona natura masani po o lona uiga, o le tau faamatau lea i se faitau aofai o tagata, po o le tauanau malosi o se Malo po o se faalapotopotoga faava o malo ina ia faia pe aloese mai le faia o so o se gaoioiga.

(2) O se tagata ua faamaonia faaletulafono i se soligatulafono i lalo o:

- (a) le faafuaiupu (1)(b)(i), e noatia e nofosala i le falepuipui mo le olaga atoa; po o
- (b) le faafuaiupu (1)(a) po o le (b)(ii), e noatia i se sala tupe e lē silia le 750 iunite tau faasalaga po o le nofosala i le falepuipui mo se vaitaimi e lē silia le 12 tausaga, po o faasalaga uma e lua.

(3) Ua faia e se tagata se soligatulafono o ia lea ua auai e avea o se vaega e afaatasi i le tuufaatasia po o le faatonuina o isi tagata e auai i, po o e lagolago atu i le tuuina atu po o le aoina mai o meatotino po o tupe:

(a) e faia ai se gaoioiga faaterorisi po o mo le manuia o se faalapotopotoga ua faamaotiina; po o

(b) le faia o so o se isi lava gaoioiga -

(i) e mafua ai:

(A) le oti; po o

(B) manuaga i le tino; po o

(ii) e mafua ai:

(A) le oti; po o

(B) manuaga i le tino,

i so o se tagata e le o auai i vevesi e faaaogāina ai auupega, pe afai o le faamoemoega o sea gaoioiga i lona natura masani po o lona uiga, o le tau faamatau lea i se faitau aofai o tagata, po o le tauanau malosia o se Malo po o se faalapotopotoga faava o malo ina ia faia pe aloese mai i le faia o so o sea gaoioiga.

(4) O se tagata ua faamaonia faaetulafono i se soligatulafono i lalo o:

(a) le faafuaiupu (3)(b)(i)(A), e ao ona faasalaina e nofosala i le falepuipui mo le olaga atoa; po o

(b) le faafuaiupu (3)(a) ma le (b)(i)(B), e noatia i se sala tupe e lē silia le 1,000 iunite tau faasalaga po o le nofosala i le falepuipui mo se vaitaimi e lē silia le 15 tausaga, po o faasalaga uma e lua; po o

(c) le faafuaiupu (3)(b)(ii)(A), e noatia e nofosala i le falepuipui mo le olaga atoa; po o

(d) le faafuaiupu (3)(b)(ii)(B), e noatia i se sala tupe e lē silia le 750 iunite tau faasalaga po o le nofosala i le falepuipui mo se vaitaimi e lē silia le 12 tausaga, po o faasalaga uma e lua.

**25. Tuuina atu o meatotino po o auaunaga i se vaega terorisi-**(1) So o se tagata o ia lea ua ia faaavanoa i se auala tuusao pe leai foi se meatotino po o tupe po o isi auaunaga e faasino i ai, po o mo le manuia ai o se vaega terorisi, ua faia e ia se soligatulafono.



(2) E noatia se tagata ua faamaonia faaletulafono i se soligatulafono ua faia i lalo o le faafuaiupu (1) i se sala tupe e lē silia le 1,000 iunite tau faasalaga po o le nofosala i le falepuipui mo se vaitaimi e lē silia le 15 tausaga, po o faasalaga uma e lua.

(3) I totonu o lenei fuaiupu, o le “faaavanoaina atu” o lona uiga o le faaavanoaina atu e ala i so o se auala, i se faiga tuusao pe lei foi, tulaga atoatoa po o i se vaega.

**26. Tagofiaina o meatotino faaterorisi-(1)** Ua faia se soligatulafono e se tagata o ia lea:

- (a) ua ia tagofiaina, tusa lava po o i se faiga tuusao pe lei foi, so o se meatotino faaterorisi; po o
- (b) le aoina, maua po o le umiaina o se meatotino faaterorisi; po o
- (c) ua faaulufaleina atu i totonu, po o ua faafaigofieina i se auala tuusao pe lei so o se gaoioiga e tusa ai o meatotino faaterorisi; po o
- (d) le faaliliu, natia po o faafoliga sese se meatotino faaterorisi.

(2) E noatia se tagata ua faamaonia faaletulafono i se soligatulafono i lalo o lenei fuaiupu i se sala tupe e lē silia le 1,000 iunite tau faasalaga, po o le nofosala i le falepuipui mo se vaitaimi e lē silia le 15 tausaga, po o faasalaga uma e lua.

(3) E le o faia e se tagata se soligatulafono i lalo o le faafuaiupu (1) pe afai o lea tagata:

- (a) ua ia logoina le Loia Sili, i se faiga tusitusia, i se taimi vave lava ua ia iloa ai e faapea o le meatotino, o se meatotino faaterorisi; ma
- (b) faia se gaoioiga e tusa ai ma faatonuga talafeagai uma a le Loia Sili, e tusa ai o le meatotino po o auaunaga tau tupe.

(4) I totonu o lenei fuaiupu, “tagofia” o lona uiga o le tagofiaina i so o se auala, tuusao pe lei foi, tulaga atoatoa po o i se vaega.

*Vaevaega 5 - Ave faamalosia  
faasolitulafono o se vaalele*

**27. Ave faamalosia ma taumafaiga, ma isi tulaga faapena e ave faamalosia-**(1) Ua faia se soligatulafono e se tagata o ia lea o lo o i luga o se vaalele i se faiga malaga i le ea, ua faaaogāina se faiga faamalosi po o tau faamatau o so o se ituaiga, e ave faamalosia ai po o ua taumafai e faatonutonu le vaalele.

(2) E ono mafai ona faia taualumaga mo se soligatulafono i lalo o lenei fuaiupu pe afai:

- (a) o le soligatulafono na faia i luga o se vaalele ua faamauina i totonu o Samoa; po o
- (b) le vaalele lea sa faia ai le soligatulafono ua tulaueleele i totonu o le atunuu o Samoa ma o lē ua tuuaia i le soligatulafono o lo o i ai i luga o le vaalele; po o
- (c) ua faia le soligatulafono i luga o se vaalele ua tologiina faalisi e aunoa ma se auvaa, i se tagata e lisiina, o ia lea o lo o i ai le nofoaga autu o lana pisinisi i totonu o Samoa po o, pe afai e leai se nofoaga autu o pisinisi a le tagata e lisiina i totonu o Samoa, po o pe afai o le tagata e lisiina o se tagata nofomau o Samoa.

(3) Ua faia se soligatulafono e se tagata o ia lea o lo o i luga o se vaalele i se faiga malaga i le ea, ua taumafai e aveeseina faamalosi po o ua taumafai e faatonutonuina le vaalele (e ala i le faaaogāina o se faiga faamalosi po o tau faamatau o so o se ituaiga).

(4) Ua faia e se tagata se soligatulafono o ia lea ua ia tau faamatau e faia se soligatulafono i lalo o le fuaiupu 27.

(5) Ua faia e se tagata se soligatulafono o ia lea ua auai e avea o se vaega e tuufaatasia po o le faatonuina o isi tagata e auai i, po o i so o se isi lava auala e lagolago i:

- (a) le ave faamalosia po o le faatonutonuina o se vaalele (e ala i le faaaogāina o se faiga faamalosi po o tau faamatau o so o se ituaiga); po o

- (b) le taumafaiga e ave faamalosi po o le faatonutonuina o le vaalele (e ala i le faaaogāina o se faiga faamalosi po o tau faamatau o so o se ituaiga).
- (6) O se tagata o ia lea ua ia faia se soligatulafono i lalo o:
  - (a) le faafuaiupu (1) po o le (5)(a), e noatia e nofosala i le falepuipui mo se vaitaimi e lē silia le 15 tausaga; po o
  - (b) le faafuaiupu (3), (4) po o le (5)(b), e noatia e nofosala i le falepuipui mo se vaitaimi e lē silia le 12 tausaga.

**28. Faaogāina o le Tulafono o Vaalele Sivili 1998** - O malosiaga o le taitai-au o se fua-vaalele i lalo o le Tulafono o Vaalele Sivili 1998 e faasino i solitulafono i luga o vaalele, e tataua ona faalautele ma faaaogāina e tusa ai o le soligatulafono o le ave faamalosi o se vaalele i lalo o leni Tulafono, e faapei ai o se soligatulafono o se soligatulafono ua faia i lalo o le Tulafono o Vaalele Sivili 1998.

*Vaevaega 6 - Soligatulafono e aafia  
ai auupega faaniukilia ma isi meafaitino*

**29. Feaveaia faasolitulafono o meafaitino faaniukilia-(1)**  
O se tagata o ia lea ua ia faaulufaleina mai faasolitulafono ni meafaitino faaniukilia i totonu, po o ua ia auina atu mai Samoa meafaitino faaniukilia, po o ua felauaia i se isi faiga e ese ai se meafaitino faaniukilia i totonu po o e faauitu atu i Samoa, e aafia ai lona vateatea po o lona sone tau tamaoaiga e aunoa ma se uluai maliega tusitusia a le Pule o le Tiute, ua faia e ia se soligatulafono.

(2) E noatia se tagata ua faamaonia faaletulafono i se soligatulafono i lalo o le faafuaiupu (1), e nofosala i le falepuipui mo se vaitaimi e lē silia le 15 tausaga.

(3) O se tagata o ia lea ua ia faia se faamatalaga sese pe tau faasese i le faamoemoe ina ia maua mai ai le maliega a le Pule o le Tiute lea e manaomia i lalo o leni fuaiupu, ua faia e ia se soligatulafono.

(4) E noatia se tagata ua faamaonia faaletulafono i se soligatulafono i lalo o le faafuaiupu (3), i se sala tupe e lē silia le 1,000 iunite tau faasalaga po o le nofosala i le falepuipui mo se vaitaimi e lē silia le 15 tausaga, po o faasalaga uma e lua.

(5) E faatoa mafai ona tuuina atu le maliega tusitusia a le Pule o le Tiute i lalo o lenei fuaiupu, i le i ai faatasi ma le faamaoniga a le Minisita e nafa ma Tiute, ma pe afai ua faamalievina e faapea o le a puipuia so o se meafaitino faaniukilia i tulaga ua faamaoti mai i le Feagaiga o Meafaitino Faaniukilia, a o faagasolo ai le felauaia faava o malo.

**30. O isi gaoioiga faasolitulafono e faasino i meafaitino faaniukilia, e aofia ai le taumafai, auai ma le tau faamatau-**(1) Ua faia e se tagata se soligatulafono o ia lea:

- (a) e aunoa ma se pule faataga faaletulafono ua ia taliaina ma le iloa lelei, umia, faaaogāina, faaliliuina, suia, lafoaia po o le faasalalau o ni meafaitino faaniukilia ua mafua ai -
    - (i) le oti o se tagata; po o
    - (ii) manuaga tuga i se tagata po o faatamaiaga tele i meatotino po o le siosiomaga; po o
  - (b) ua ia gaoi meafaitino faaniukilia; po o
  - (c) ua faaaogā sese pe mauaina mai i se tulaga tau faasese meafaitino faaniukilia; po o
  - (d) ua faia se gaoioiga e aunoa ma se pule faataga faaletulafono, faasaga i se nofoaga ma fale o niukilia, po o ua ia faalavelaveina se nofoaga ma fale o niukilia ua mafua ai -
    - (i) le oti o se tagata; po o
    - (ii) manuaga tuga i se tagata po o faatamaiaga tele i meatotino po o i le siosiomaga.
- (2) Ua faia se soligatulafono e se tagata o ia lea:
- (a) e aunoa ma se pule faataga faaletulafono ua ia taliaina ma le iloa, umia, faaaogāina, faaliliuina, suia, lafoaia po o le faasalalauina o meafaitino faaniukilia ua mafua ai -
    - (i) le oti o se tagata; po o

- (ii) manuaga tuga i se tagata po o faatamaiaga matuia i meatotino po o i le siosiomaga; po o
  - (b) ua taumafai e gaioi se meafaitino faaniukilia; po o
  - (c) ua taumafai e faaaogā sese po o le maua mai i se faiga tau faasese meafaitino faaniukilia; po o
  - (d) e aunoa ai ma se pule faataga faaletulafono ua faia se gaioioiga faasaga i se nofoaga niukilia po o le faalavelaveina o se nofoaga niukilia e mafua ai -
    - (i) le oti o se tagata; po o
    - (ii) manuaga tuga i se tagata po o faatamaiaga tele i meatotino po o le siosiomaga.
- (3) Ua faia se soligatulafono e se tagata o ia lea ua auai e aveia o se vaega e tuufaatasia po o e faatonuina isi tagata e auai faatasi i, po o i so o se isi lava auala e lagolago i le faaaogāina faaterorisi o meatau faaniukilia:
- (a) ua mafua ai -
    - (i) le oti; po o
    - (ii) manuaga tuga i se tagata po o faatamaiaga tele i meatotino po o le siosiomaga; po o
  - (b) ua mafua ai -
    - (i) le oti; po o
    - (ii) manuaga tuga i se tagata po o faatamaiaga tele i meatotino po o i le siosiomaga.
- (4) O se lagolago ua tuuina atu i lalo o leni fuaiupu, e ao ona faia ma le faamoemoe ma ia faia i le faamoemoe o le faaopopo atu i gaioioiga faasolitulafono lautele, po o se faamoemoe o se vaega, po o le faia ma le iloa o le faamoemoe o le vaega ia faia le soligatulafono po o soligatulafono ua taua.
- (5) Ua faia e se tagata se soligatulafono o ia lea:
- (a) ua faaaogāina se tau faamatau po o se faiga faamalosi po o so o se isi lava faiga o tau faamatau e maua faamalosi ai meafaitino faaniukilia, tuuina atu o meafaitino aaveuila po o

auupega aaveuila po o se nofoaga o niukilia ina ia faaavanoaina po o mo le avanoa ai i se nofoaga o niukilia;

(b) ua tau faamatau -

(i) e faaaogāina meafaitino faaniukilia e mafua ai:

(A) le oti o so o se tagata; po o

(B) manuaga tuga i so o se tagata po o faatamaia tele i so o se meatotino po o i le siosiomaga; po o

(ii) le gaoi o meafaitino faaniukilia e tauanau malosi ai se tagata, Atunuu po o se faalapotopotoga faava o malo e faia po o le aloese mai le faia ai o so o se gaoioiga; po o

(c) ua tau faamatau e faia se gaoioiga faasaga i se nofoaga faaniukilia, le faalavelaveina o, faaaogāina po o le faatamaia o se nofoaga faaniukilia, po o le faatupulaia ai o le tulaga lamatia o le faasaoloto ese mai o meafaitino aaveuila, ua mafua ai -

(i) le oti o se tagata; po o

(ii) manuaga tuga i se tagata po o faatamaia tele i meatotino po o i le siosiomaga; po o

(iii) le tauanau malosi ai o se tagata, Malo po o se faalapotopotoga faava o malo ina ia faia po o le taofia ai o le faia o so o se gaoioiga.

(6) O se tau faamatau ua taua i le faafuaiupu (5) e ao ona faia i tulaga aliae mai ia o le a mafua ai ona talitonu se tagata talafeagai e faapea e moni le tau faamatau.

(7) O se tagata ua faamaonia faaetulafono i se soligatulafono:

(a) i lalo o le faafuaiupu (1)(a)(i) po o le (d)(i) po o le (3)(a)(i), e ao ona faasalaina e nofosala i le falepuipui mo le olaga atoa; po o

(b) i lalo o le faafuaiupu (3)(b)(i), e noatia i luga o moliaga ua faamaonia faaetulafono, e nofosala i le falepuipui mo le olaga atoa; po o

- (c) i lalo o le faafuaiupu (1)(a)(ii), (b), (c), (d)(ii), (2) po o le (3)(a)(ii) po o le (b)(ii), e noatia e nofosala i le falepuipui mo se vaitaimi e lē silia le 25 tausaga; po o
- (d) i lalo o le faafuaiupu (5), e noatia e nofosala i le falepuipui mo se vaitaimi e lē silia le lima (5) tausaga.

**31. Faaaogāina o le Tulafono o le Ofisa o Tiute 1977** - E faaaogā aiaiga o le Tulafono o le Ofisa o Tiute 1977 ia e faasino i oloa e faasaina le faaulufale mai i totonu o le atunuu ma auina atu i fafo, ae vagana ai o faasalaga mo soligatulafono i lalo o lena Tulafono, e tusa ai o meafaitino faaniukilia ma isi meafaitino ua faasaina le faaulufaleina mai ma le auina atu i fafo i lalo o lena Tulafono, i itu uma e faapei ai o le faaulufaleina mai po o le auina atu i fafo o ia oloa sa faapea lava ona faasaina i lalo o le Tulafono o le Ofisa o Tiute 1977.

*Vaevaega 7 - Feaveaia faasolitulafono o pomu palasitika matautia e lē faailogaina*

**32. Pomu palasitika matautia**-(1) Ua faia e se tagata se soligatulafono o ia lea ua ia:

- (a) gaosia pomu palasitika matautia e lē faailogaina ma lona iloa lelei e le o faailogaina; po o
  - (b) ua ia umia, felauai, po o le faaulufale mai i totonu, po o le auina atu i fafo o pomu palasitika matautia e lē faailogaina i totonu po o fafo atu o Samoa ma lona iloa lelei e le o faailogaina; po o
  - (c) le faaaogāina po o le faaliliuina ese o pomu palasitika matautia e lē faailogaina mo faamoemoega e lē ogatasi ma lena Tulafono.
- (2) O se tagata ua faamaonia faaetutulafono i se soligatulafono i lalo o le faafuaiupu (1), e noatia i se sala tupe e lē silia le 1,000 iunite tau faasalaga po o le nofosala i le falepuipui mo se vaitaimi e lē silia le 10 tausaga, po o faasalaga uma e lua.

(3) E le o faia e se tagata se soligatulafono i lalo o lenei fuaiupu pe afai:

(a) ua gaosia e le tagata po o le taofia, umia po o le felauaia pomu palasitika matautia e lē faailogaina i se aofaiga ua faamaonia i se faiga tusitusia e le Komesina e faapitoa mo na o le faaaogāina -

(i) i suesuega, atinae po o le suesueina o le lelei atoatoa o mea papa matautia fou po o mea papa matautia ua toe faafouina; po o

(ii) o lo o aoaoina i le sueina ma sailia o mea papa matautia; po o

(iii) o lo o atiaaina pe suesueina le lelei o meafaigaluega e sailia ai mea papa matautia; po o

(iv) mo faamoemoega o suesuega faasaienisi; po o

(b) ua fuafuaina pomu palasitika matautia e lē faailogaina e faamoemoe e faaaogāina, ma ua tuufaatasia e avea o se vaega autu talafeagai o masini faatagaina faamiliteri i Samoa i totonu o le tolu (3) tausaga talu ona faamamaluina le Feagaiga o Pomu Palasitika Matautia i totonu o Samoa.

**33. Malosiaga e ulufale ai-**(1) E mafai e se tagata ofisa ua faatagaina e ala i se faiga tusitusia e le Komesina, ona ulufale atu i nofoaga ma fale, pe afai e i ai ni mafuaaga talafeagai ua ia talitonu ai e faapea, o lo o gaosia mea papa matautia, tausia pe teuina ma faia so o se gaoioiga ua taua e faapea:

(a) suesueina ma faia suesuega i nofoaga ma fale e sailia ai pe ua faia se soligatulafono i lalo o le fuaiupu 30;

(b) asiasia so o se faamaumauga, pepa aloaia po o meafaigaluega ua maua ai i nofoaga ma fale;

(c) faia ata o, po o faamatalaga ootoo mai faamaumauga po o pepa aloaia; po o



- (d) le aveeseina o so o se mea papa matautia ua maua o lo o gaosia, tausia po o o lo o teuina ai i nofoaga ma fale.
- (2) Ua faia e se tagata se soligatulafono o ia lea:
  - (a) ua ia tetee pe faalavelaveina se tagata ofisa faatagaina i lalo o le faafuaiupu (1) mai le faatinoina o malosiaga ua taua i le faafuaiupu (1); po o
  - (b) ua ia tuuina atu ma lona iloa lelei faamatalaga sese e tali atu ai i se suesuega i lalo o le faafuaiupu (1); po o
  - (c) ua taofiofia so o se faamatalaga faapitoa e tali atu ai i se suesuega i lalo o le faafuaiupu (1).
- (3) O se tagata ua faamaonia i luga o moliaga faaletulafono i se soligatulafono i lalo o le faafuaiupu (2), e noatia i luga o moliaga i se sala tupe e lē silia le 200 iunite tau faasalaga po o, e nofosala i le falepuipui mo se vaitaimi e lē silia le lua (2) tausaga, po o faasalaga uma e lua.

*Vaevaega 8 - Solitulafono e faia i se malae vaalele*

**34. Faiga faatupu vevesi i se malae vaalele-**(1) Ua faia e se tagata se soligatulafono, o ia lea ua ia faaogāina faasolitulafono ma lona loto i ai so o se masini, vailaau oona po o se auupega lea e lamatia ai pe faaono lamatia ai le saogalemu i le malae vaalele:

- (a) e ala i le faia o se gaioiga faatupu vevesi faasaga i se tagata i se malae vaalele o lo o ia tuuina atu auaunaga tau vaalele sivili faava o malo ua mafua ai -
  - (i) manuaga tuga i se tagata; po o
  - (ii) le oti o se tagata; po o
- (b) e ala i le tau faamatau e faatino se gaioiga faatupu vevesi faasaga i se tagata i se malae vaalele o lo o tuuina atu ai auaunaga tau vaalele sivili faava o malo ua mafua ai -
  - (i) manuaga tuga i se tagata; po o
  - (ii) le oti o se tagata; po o

- (c) e ala i le faaleagaina po o le faatamaia ogaoga o nofoaga ma fale o se malae vaalele po o malae vaalele o lo o tuuina atu ai auaunaga tau vaalele sivili faava o malo po o vaalele e le o faaaogāina o lo o i ai; po o
  - (d) e ala i le faalavelaveina o auaunaga i se malae vaalele.
- (2) O se tagata ua faamaonia faaletulafono i se soligatulafono i lalo o:
- (a) le faafuaiupu (1)(a)(i), (b)(i), (c) po o le (d), e noatia e nofosala i le falepuipui mo se vaitaimi e lē silia le 12 tausaga; po o
  - (b) le faafuaiupu (1)(a)(ii) ma le (b)(ii), e ao ona faasalaina e nofosala i le falepuipui mo le olaga atoa.

**35. Taumafai e fai se gaoioiga faatupu vevesi i se malae vaalele-**(1) Ua faia e se tagata se soligatulafono o ia lea ua ia faaaogāina faasolitulafono ma lona loto i ai so o se masini, vailaau oona po o se auupega lea e lamatia ai pe faaono lamatia ai le saogalemu i le malae vaalele:

- (a) e ala i le faatinoina o se gaoioiga faatupu vevesi faasaga i se tagata i se malae vaalele o lo o tuuina atu auaunaga tau vaalele sivili faava o malo e mafua ai -
  - (i) manuaga tuga i se tagata; po o
  - (ii) le oti o se tagata; po o
- (b) e ala i le tau faamatau e faatino se gaoioiga faatupu vevesi faasaga i se tagata i se malae vaalele o lo o tuuina atu auaunaga tau vaalele sivili faava o malo ua mafua ai -
  - (i) manuaga tuga i se tagata; po o
  - (ii) le oti o se tagata; po o
- (c) e ala i le taumafai e faaleagaina po o le faatamaia ogaoga o nofoaga ma fale o se malae vaalele, po o le malae vaalele o lo o tuuina atu ai auaunaga tau vaalele sivili faava o malo, po o vaalele e le o faaaogāina o lo o i ai; po o

- (d) e ala i le taumafai e faalavelaveina auaunaga i se malae vaalele.
- (2) O se tagata ua faamaonia faaletulafono i se soligatulafono i lalo o:
- (a) le faafuaiupu (1)(a)(i), (b)(i), (c) po o le (d), e noatia e nofosala i le falepuipui mo se vaitaimi e lē silia le fitu (7) tausaga; po o
- (b) le faafuaiupu (1)(a)(ii) po o le (b)(ii), e noatia e nofosala i le falepuipui mo le olaga atoa.

#### **VAEGA IV**

#### **SAOGALEMU O LE GATAIFALE**

**36. Faoa faamalosi o se vaa po o fausaga mautu-**(1) Ua faia e se tagata se soligatulafono o ia lea ua ia faia faasolitulafono ma le faamoemoe:

- (a) e faoa faamalosi, po o le faatino o le faatonutonuina o se vaa po o se fausaga mautu e ala i le faaaogāina o le malosi po o le tau faamatau e faaaogā le malosi po o so o se isi faiga tau faamatau; po o
- (b) ua faia po o ua faatinoina se gaoioiga faatupu vevesi faasaga i se tagata o i luga o se vaa po o se fausaga mautu lea e ono lamatia ai le faatautaiga saogalemu o le vaa po o le saogalemu o le fausaga mautu; po o
- (c) le faatamaia o se vaa po o se fausaga mautu; po o
- (d) le mafua ai o le faaleagaina o se vaa po o lana uta po o se fausaga mautu lea e faaono lamatia ai le saogalemu o le faatautaiga o le vaa po o le saogalemu o le fausaga mautu; po o
- (e) e tuuina po o le taulamua ina ia tuuina i luga o se vaa po o se fausaga mautu se masini po o se vailaau oona e faaono tulai mai ai -
- (i) mo se vaa, e faaleaga ai le vaa po o le mafua ai faatamaia i le vaa po o lana uta, po o e faaono lamatia ai le faatautaiga saogalemu o le vaa; po o

- (ii) mo se fausaga mautu, e faaleaga ai le fausaga mautu po o e lamatia ai lona saogalemu; po o
- (f) le faaleaga ai po o le faatamaia ogaoga ai o nofoaga tau faatautaiga i le gataifale po o e faalavelaveina ai i se tulaga matuia a latou galuega i se auala e faaono lamatia ai le faatautaiga saogalemu o se vaa; po o
- (g) le tuuina atu o faamatalaga ia na te iloa lelei e sese, e lamatia ai le faatautaiga saogalemu o se vaa; po o
- (h) le faamanualia ai o so o se tagata e fesootai ma le faia, po o le taumafai e faia se soligatulafono o lo o taua i le parakalafa (a), (b), (c), (d), (e), (f) po o le (g); po o
- (i) e ala i le tauanauina o se isi tagata e faia po o le aloese mai le faia o so o se gaoioiga, tau faamatau e faia so o se gaoioiga ua faamatalaina e faasino i se vaa po o se fausaga mautu, pe afai o sea tau faamatau e faaono lamatia ai le saogalemu o le vaa po o le fausaga mautu po o so o se tagata o i ai; po o
- (j) ua taumafai po o ua tau faamatau e faia po o e fesoasoani po o, ua avea o se vaega auai i le faia o so o se gaoioiga o lo o taua i le parakalafa (a) e oo atu i le (i); po o
- (k) le fasiotia o so o se tagata e fesootai ma le faia, po o le taumafai e faia se soligatulafono ua taua i le parakalafa (a), (b), (c), (d), (e), (f) po o le (g).
- (2) So o se tagata ua faamaonia faaetulafono i se soligatulafono i lalo o le:
- (a) faafuaiupu (1)(a) e oo atu i le (j), e noatia e nofosala i le falepuipui mo se vaitaimi e lē silia le 15 tausaga; po o
- (b) le faafuaiupu (1)(k), e noatia e nofosala i le falepuipui mo le olaga atoa.

**37. Faaaogāina o vailaau niukilia, kemikale po o isi vailaau oona i luga o se vaa po o fausaga mautu-(1)** Ua faia e se tagata se soligatulafono o ia lea ua ia faia faasolitulafono ma ua ia faamoemoe:

(a) e tau faamatau se faitau aofai o tagata po o ua faamalosi se Malo po o se faalapotopotoga faava o malo e faia po o e aloese mai le faia o so o se gaoioiga -

(i) ua ia faaaogāina faasaga i po o i luga o po o faatinoina mai se fausaga mautu po o se vaa so o se meatau faaniukilia, kemikale po o auupega faapaiolosi po o malosi o aaveuila, po o meafaitino tau niukilia i se faiga lea e mafua ai po o e ono faaoo ai:

(A) le oti o se tagata; po o

(B) manuaga tuga i se tagata po o faatamaiaga; po o

(ii) ua faatinoina mai se nofoaga mautu po o suauu o vaa, kasa faalenatura ua liu suavai po o isi kasa matautia po o vailaau oona ia e le o taua mai i le parakalafa (a)(i) i sea aofaiga po o ni vailaau ia e mafua ai po o e ono faaoo ai:

(A) le oti o se tagata; po o

(B) manuaga tuga i se tagata po o faatamaiaga; po o

(iii) ua ia faaaogāina se vaa i se faiga lea e mafua ai:

(A) le oti o se tagata; po o

(B) manuaga tuga i se tagata po o faatamaiaga; po o

(iv) le tau faamatau e faia se soligatulafono o lo o taua i le parakalafa (a)(i), (ii) po o le (iii); po o

(b) ua ia felauaia i luga o se vaa -

(i) so o se mea papa matautia po o meafaitino o malosi o aaveuila ma lona iloa lelei ua faamoemoe e faapogai ai po o le tau faamatau ina ia faaaogāina e faaoo ai:

(A) le oti o se tagata; po o

(B) manuaga tuga i se tagata po o le faatamaia ai,

ma le faamoemoe e tau faamatau ai se vaega toatele o tagata po o e faamalosi ai se Malo po o se faalapotopotoga faava o malo ina ia faia po o le aloese mai le faia o se gaoioiga;

(ii) o so o se auupega faaniukilia, faakemikale po o le faapaiolosi;

(iii) so o se meafaitino faavae, meafaitino faapitoa o niukilia e mafai ona papa po o meafaigaluega po o meafaitino ua fuafua po o ua saunia faapitoa mo le gaosiga, faaaogāina po o le gaosiga o meafaitino faapitoa o niukilia e mafai ona papa, ma le iloa lelei ua faamoemoe po o e ono faaaogāina i se gaoioiga faaniukilia o mea papa matautia, po o i so o se isi gaoioiga faaniukilia e le o malupuipua e tusa ai o maliega manino tau puipuga a Lala Soupu Faava o Malo o Malosiaga Faa-Atomika;

(iv) so o se meafaigaluega, meafaitino, po o polokalame faakomepiuta po o se tekonoosi e fesootai i ai lea ua faamoemoe e lagolago i le fuafuaina, gaosia, po o le faaooina atu o se auupega faaniukilia, faakemikale po o le faapaiolosi;

(v) se tagata o ia lea ua ia faia se gaoioiga lea e aofia ai i le faia o se soligatulafono i lalo o leni fuaiupu ma le faamoemoe e lagolagoina ai lea tagata ina ia aloese mai moliaga faasolitulafono; po o

(c) ua faamanualia ai se isi tagata o lo o aofia ai i le faia o so o se soligatulafono i lalo o leni fuaiupu; po o

(d) ua mafua ai le maliu o se isi tagata o lo o aofia ai i le faiga, po o taumafai e faia se soligatulafono i lalo o leni fuaiupu.

(2) O se tagata ua faamaonia faaletulafono i se soligatulafono i lalo:

- (a) o le faafuaiupu (1)(a)(i)(A), (ii)(A), (iii)(A), (b)(i)(A) po o le (d), e noatia e nofosala i le falepuipui mo le olaga atoa; po o
- (b) le faafuaiupu (1)(a)(i)(B), (ii)(B), (iii)(B), (iv), (b)(i)(B), (ii) e oo atu i le (v) po o le (c), e noatia e nofosala i le falepuipui mo se vaitaimi e lē silia le 15 tausaga.

**38. Pueina faapagota ma le faaooina atu-**(1) E mafai e le alii vaa o se vaa ua faamauina i totonu o Samoa o ia lea ua i ai mafuaaga talafeagai e talitonu ai e faapea, ua faia e se tagata se soligatulafono i lalo o le fuaiupu 36 ma le 37, po o luga o se vaa:

- (a) ona pueina faapagota ma taofia le tagata; ma
  - (b) faaooina atu le tagata i pulega talafeagai i so o se isi lava atunuu o le feagaiga.
- (2) E ao i le alii vaa o le vaa ona:
- (a) logoina pulega i le isi atunuu o le feagaiga a o le i faaooina atu le tagata; ma
  - (b) tuuina atu i pulega faamatalaga molimau o lo o ia te ia e faamaonia ai na faia e le tagata se soligatulafono.
- (3) Afai ua faaooina atu le tagata i se leoleo:
- (a) e tatau i le leoleo ona taofia le tagata seia vagana ai ua ia te ia mafuaaga talafeagai e talitonu ai e faapea, e le i faia e lea tagata le soligatulafono; ma
  - (b) afai e teena e le leoleo le taofia o le tagata, ia tuuina atu mafuaaga tusitusia mo le teena o le taofia.

## VAEGA V

### PULEA MA LE FAOA FAAMALOSIA O MEATOTINO A FAALAPOTOPOTOGA UA FAAMAOTIINA

**39. Faaaogāina o lenei Vaega-**(1) E aunoa ma le faatapulaaina o le faaaogāina o le Tulafono o Tupe Maua Mai i Soligatulafono 2007, o lenei Vaega e faaaogāina i se

faalapotopotoga ua faamaotiina e pei ona taua i lalo o le fuaiupu 4(2).

(2) O meatotino ia o lo o noatia i se faatonuga a le Palemia i lalo o lenei Vaega, e tatau ona taofia ma pulea e le Pule Faafoe e aunoa ma le faatuai, po o se uluai faasilasilaga i le tagata o ia lea o lo o ia taofia po o pulea le meatotino.

**40. Faatonuga e pulea ai meatotino-**(1) E mafai e le Palemia e ala i se pepa faaletulafono tusitusia ona tofia ma faatonu le Pule Faafoe ina ia taofia ma pulea le meatotino, pe afai e i ai mafuaaga talafeagai e talitonu ai le Palemia e faapea, o le meatotino o se meatotino faaterorisi o lo o umia po o o lo o pulea e se faalapotopotoga ua faamaotiina lea o lo o faasino i ai lenei Vaega.

(2) O le faatonuga:

(a) e ao ona faamaoti mai ai le meatotino o lo o aafia; ma

(b) e mafai ona noatia ma fai fuafua i tuutuuga.

(3) E ao i se tagata o ia lea o lo o ia taofia po o pulea le meatotino o lo o taua i le faatonuga, ona faatagaina le Pule Faafoe ina ia taofia ma pulea e ia le meatotino ina ia tusa ai ma le faatonuga.

**41. Faasilasilaga o le faatonuga-**(1) E ao i le Palemia ona faia se faatonuga i lalo o le fuaiupu 40:

(a) ina ia faaooina atu -

(i) i se taimi vave lava e mafai ai, i le tagata o ia lea o lo o ia umia po o pulea le meatotino po o, afai e le o i Samoa le tagata, ia faaoo atu i le sui sooupu po o le sui o le tagata o lo o i Samoa; ma

(ii) i so o se isi lava tagata lea ua manatu le Palemia e mafai ona i ai sana aia i le meatotino; ma

(b) afai e le i mafai ona faaooina atu e tusa ai ma le parakalafa (a), e ao ona lomua faasalalau i le Savali po o se isi nusipepa o lo o faasalalauina i totonu o Samoa.

(2) O le lē usitaia o le faafuaiupu (1) o le a lē aafia ai le tulaga aloaia o le faatonuga.



**42. Fesuaiga, faalēaogāina, po o le faamutaina o le aogā o le faatonuga-**(1) E mafai e le Palemia:

- (a) e ala i se isi faatonuga i lalo o le fuaiupu 40, ona suia tuutuuga o le faatonuga po o le meatotino lea o lo o noatia i le faatonuga; po o
  - (b) le faalēaogāina o se faatonuga ua faia i lalo o le fuaiupu 40.
- (2) E ao ona tuuina atu se faasilasilaga o so o se fesuaiga po o le faalēaogāina i lalo o lenei fuaiupu e tusa ai ma le fuaiupu 41.
- (3) Afai e le i faalēaogāina i se taimi muamua atu, e faamuta le aogā o se faatonuga i lalo o le fuaiupu 39 e faasino i meatotino a se faalapotopotoga ua faamaotiina pe afai:
- (a) mo meatotino a se faalapotopotoga ua faamaotiina lea o lo o faasino i ai lenei Vaega, ua faamuta ona toe avea lea faalapotopotoga ma faalapotopotoga ua faamaotiina; po o
  - (b) ua faia se poloaiga e faoa faamalosi ai le meatotino i lalo o le fuaiupu 51.

**43. E mafai e le Faamasinoga ona suia pe faalēaogāina faatonuga-**(1) E mafai e se tagata (“lē o talosaga”) o ia lea o lo o ia umia, talosagaina se aia i, po o o lo o pulea atoatoa le meatotino lea e noatia i se faatonuga i lalo o le fuaiupu 39, ona talosaga i le Faamasinoga e suia pe faalēaogāina le faatonuga.

- (2) E mafai e le Faamasinoga ona:
- (a) teena le talosaga pe afai ua faia le faaiuga a le Faamasinoga e faapea o lo o i ai mafuaaga talafeagai mo se faatonuga i lalo o le fuaiupu 40; po o
  - (b) le faalēaogāina o le faatonuga pe afai ua faia le faaiuga a le Faamasinoga e faapea e leai ni mafuaaga talafeagai e lagolago ai le faatonuga i lalo o le fuaiupu 40.
- (3) Afai ua faalēaogāina e le Faamasinoga le faatonuga, e ao i le Loia Sili ona:
- (a) logoina le tagata o ia lea o lo o ia umia po o o lo o vaavaaia le meatotino e uiga i le faaiuga i se faiga tusitusia; ma

(b) lomia faasalalau se faasilasilaga o le faalēaogāina i le Savali po o so o se isi lava nusipepa o lo o faasalalauina i totonu o Samoa.

(4) O le mafuaaga autu e mafai ai e le Faamasinoga ona suia po o le faalēaogāina se faatonuga i lalo o le fuaiupu 40 o le tulaga e faapea, e le o i ai ni mafuaaga talafeagai e talitonuina ai e faapea, o le tagata po o le faalapotopotoga, o se faalapotopotoga ua faamaotiina lea o lo o faasino i ai lenei Vaega.

**44. Taulumaga-**(1) O aiaiga nei e faaaogā i so o se talosaga e faia i le Faamasinoga i lalo o lenei Vaega:

(a) e ao ona faia le talosaga e tusa ai ma Tulafono Faafoe o le Faamasinoga; ma

(b) e ao i lē ua talosaga ona faaoo atu le talosaga i le Loia Sili; ma

(c) e ao ona fofogaina le Loia Sili e uiga i le talosaga.

(2) I le fofogaina ma le faia ai o se faaiuga o se talosaga i lalo o lenei Vaega, e mafai e le Faamasinoga ona:

(a) fofogaina so o se faamatalaga molimau po o faamatalaga ua tuuina atu e le Loia Sili, i le toesea ai o le faalapotopotoga ua faamaotiina po o, loia o lo o avea ma sui o le faalapotopotoga ua faamaotiina, po o tagata lautele, pe afai e manatu le Faamasinoga e faapea o le faailoaina atu o le faamatalaga o le a afaina ai le saogalemu o le atunuu pe lamatia ai le saogalemu o so o se tagata; ma

(b) talia e avea ma faamatalaga molimau so o se mea lea o le a lē taliaina i se isi faiga e ese ai e avea ma faamatalaga molimau (e aofia ai faamatalaga mai so o se faapogai) lea e manatu le Faamasinoga e talafeagai; ma

(c) afai ua faaaogāina le parakalafa (a), ia tuuina atu i le faalapotopotoga ua faamaotiina se faamatalaga e ootoo ai le faamatalaga lea ua i luma o le Faamasinoga, e aunoa ma le faailoaina atu o so o se faamatalaga lea e manatu le Faamasinoga

e mafai ona afaina ai le saogalemu o le atunuu pe lamatia ai le saogalemu o so o se tagata; ma  
 (d) tofia se *faufautua a le Faamasinoga* e fesoasoani i le Faamasinoga.

**VAEGA VI**  
**TAOFIA MA LE FAOA FAAMALOSIA**  
**O MEATOTINO FAATERORISI**

**45. Faaaogāina o le Tulafono o Tupe Maua Mai i Soligatulafono 2007** - E faaaogā aiaiga e faasino i poloaiga e faoa faamalosia ai ma taofia meatotino i lalo o le Tulafono o Tupe Maua Mai i Soligatulafono 2007, ae vagana ai faasalaga mo soligatulafono i lalo o lea Tulafono, (faatasi ai ma suiga talafeagai uma), i meatotino a se faalapotopotoga ua faamaotiina i lalo o le fuaiupu 4(2), po o ua faaaliamanino i lalo o le fuaiupu 5, e faapei ai na faoa faamalosia pe na noatia le meatotino i se poloaiga e taofia ai, i lalo o lea Tulafono.

**VAEGA VII**  
**MALOSIAGA LAUTELE**

**46. Faatonutonuina o le faaooina atu o meatotino** - E mafai e se tagata ofisa faatagaina o ia lea ua i ai mafuaaga talafeagai e talitonu ai e faapea sa faia, o lo o faia po o o le a faia e se tagata se soligatulafono i lalo o lenei Tulafono, ona ia faatagaina le meatotino a le tagata ina ia faaulufale mai, tuua po o le feaveaia i totonu o Samoa, mo le faamoemoe o le aoina mai o faamatalaga molimau e faailoagofie ai se tagata, po o e faafaigofie ai se moliaga mo le soligatulafono.

**47. Fetufaaiga o faamatalaga e faasino i vaega terorisi ma gaoioiga faaterorisi** - E mafai e le Komesina po o le Loia Sili ona faailoa atu i le pulega talafeagai o se Malo i fafo, so o se faamatalaga o lo o ia umia e faasino i so o se mea ua taua e faapea:

- (a) o gaoioiga po o feoaiga a vaega terorisi po o tagata o lo o masalomia le aafia ai i le faia o gaoioiga faaterorisi;

- (b) le faaaogāina o pepa malaga fai faagaoui po o le tau faasese e tagata o lo o masalomia le aafia ai i le faia o gaoioiga faaterorisi;
  - (c) felauaiga mai i totonu o le atunuu o mea papa matautia po o isi auupega matautia e vaega terorisi po o tagata o lo o masalomia le aafia ai i le faia o gaoioiga faaterorisi;
  - (d) le faaaogāina o fesootaiga faatekonolosi e vaega terorisi; ma
  - (e) so o se meatotino ua taua i le fuaiupu 47,
- pe afai e le o faasaina i so o se tulafono le faailoaina atu ma i lona manatu, o le a lē afaina ai le saogalemu o le atunuu po o le saogalemu o tagata lautele.

**48. Taofia o oloa ua masalomia o meatotino faaterorisi -**

E mafai e se tagata ofisa faatagaina, e aunoa ma se tusi poloaiga ona aveesea faamalosi ma taofia oloa pe afai:

- (a) na iloa e le Tagata Ofisa oloa, po o ua umia e le Tagata Ofisa a o faagasolo ai se suesuega, asiasiga, sueina faasuetusi po o suesuega ua faatagaina e le tulafono; po o
- (b) o lo o i Samoa ia oloa ma ua faamalieina le tagata ofisa faatagaina e faapea -
  - (i) ua uma, po o ua faamoemoe e auina atu i fafo atu o Samoa; po o
  - (ii) ua faaulufale mai, po o ua uma ona faaulufale mai i totonu o Samoa; ma
- (c) e i ai le mafuaaga talafeagai ua masalomia ai e le tagata ofisa e faapea, o oloa o meatotino faaterorisi.

**49. O isi aiaiga faaopoopo e uiga i le taofia o oloa i lalo o le fuaiupu 48-**(1) E mafai e se tagata ofisa faatagaina ona faaaogāina le malosi talafeagai pe afai ua alagatatau le aveesea faamalosi po o le taofia o oloa i lalo o le fuaiupu 48.

(2) Afai ua faailogofie mai le tagata o ia lea e ona po o ua ia umia oloa ia ua aveesea faamalosi ma taofia i lalo o le fuaiupu 48, ae peitai e le i auai i le taimi na aveesea faamalosi ai ma taofia oloa (mo se faaitaiga, ona o oloa o lo o aafia o lo o

i le meli po o uta a vaalele po o i ato malaga e leai se tagata e faasino i ai), e ao i le tagata ofisa faatagaina ona faia taumafaiga talafeagai uma e logoina ai lea tagata e uiga i le taofia ma le aveesea faamalosi o oloa i se taimi vave lava e mafai ai ona faatino.

(3) E ao i oloa ua taofia i lalo o le fuaiupu 48 ona aveina i sea nofoaga e malupuipua e pei ona faatonuina ai e le tagata ofisa faatagaina, ma taofia ai i ina seia vagana ai ua faaaogaina le fuaiupu 48.

(4) E lē noatia se tagata ofisa faatagaina po o se tagata o lo o lagolago faaletulafono i se tagata ofisa faatagaina, mo le leiloa po o le faaleagaina o so o se meatotino ua afaina i so o se mea ua faia pe leai foi, po o ua faatatauina na faia e se tagata ofisa faatagaina po o se tagata o lo o lagolago faaletulafono i le agaga lelei, i le faatinoina o so o se malosiaga ua faaee atu i ai i lalo o le fuaiupu 48 e oo atu i le 52.

(5) E leai se mea i lenei Vaega e faatapulaa ai pe aafia ai malosiaga o lo o taua i lalo o le Tulafono o le Ofisa o Tiute 1977 po o le Tulafono o Puipuiga mai Tupe e Faaofi mai Faasolitulafono 2007 po o le Tulafono o Tupe Maua Mai i Soligatulafono 2007.

**50. Toe faafoiina atu o oloa na taofia i lalo o le fuaiupu 48-**(1) I totonu o lenei fuaiupu, “vaitaimi o suesuega” e faasino i oloa ua aveesea faamalosi ma taofia i lalo o le fuaiupu 48:

(a) o lona uiga, o le vaitaimi e fitu (7) aso i le tuanai ai o le aso lea ua aveesea faamalosi ai oloa ma taofia; ma

(b) e aofia ai so o se faaopoopoga o lea vaitaimi ua tuuina atu e le Faamasinoga i lalo o le fuaiupu 45.

(2) E ao ona toe faafoi oloa ua aveesea faamalosi ma taofia i lalo o le fuaiupu 48, i le tagata lea na aveesea faamalosi mai ai i se taimi vave lava e mafai ai ona faatino, i le maea ai ona tulai mai o so o se tasi o mea ua taua e faapea:

(a) ua faamaeaina suesuega talafeagai uma pe afai o faaalua mai ai e faapea o oloa, e le o ni meatotino faaterorisi; po o

(b) ua faamutaina le vaitaimi o suesuega.

(3) E lē faaogāina le faafuaiupu (2) pe afai o lo o noatia oloa i se faatonuga e faoa faamalosia pe taofia ai i lalo o le Tulafono o Tupe Maua Mai i Soligatulafono 2007.

**51. Faaopoopoina o le vaitaimi e 7 aso i le fuaiupu 50-(1)**

E mafai ona toe faaopoopoina le vaitaimi e fitu (7) aso i le fuaiupu 50(1)(a) (peitai e na o le faa-tasi lava) e ala i se poloaiga a le Faamasinoga mo se isi vaitaimi e lē silia le 28 aso pe afai, i luga o se talosaga mo le faamoemoe ua faia a o lumanai ai le aso e faamuta ai le aogā o lea vaitaimi e fitu (7) aso, ua faamalieina le Faamasinoga e faapea:

(a) o lo o i ai le mafuaaga talafeagai e masalomia ai lea o lo o manaomia i lalo o le fuaiupu 48(c); ma

(b) e faapea e talafeagai le faaopoopoga o le vaitaimi lea ua tuuina atu ina ia mafai ai ona faia ma faamaonia suesuega i totonu po o fafo atu o Samoa, e uiga i oloa po o meatotino.

(2) E ao ona faia le talosaga i le Faamasinoga i se faiga tusitusia ma faaooina atu i le tagata lea na aveesea faamalosi mai ai oloa (pe afai ua iloa lea tagata ma le nofoaga o nofo ai), ma e ao ona aofia ai faamatalaga faapitoa nei:

(a) se faamatalaga manino o oloa ua taofia;

(b) le aso lea na amata ai ona taofia;

(c) se faamatalaga o mea moni e lagolago ai le mafuaaga talafeagai e masalomia ai e pei ona manaomia e le fuaiupu 48(c); ma

(d) se faamatalaga o mafuaaga talafeagai ua mafua ai ona talosaga le faaopoopoga o le vaitaimi e mafai ai ona faia ma faamaea suesuega i totonu po o fafo atu o Samoa, e uiga i oloa po o meatotino.

(3) E agavaa le tagata lea na aveesea faamalosi mai ai oloa e auai ma tautala i le suesuega o le talosaga.

(4) E ao i le tagata ofisa faatagaina ona faia taumafaiga talafeagai uma e logoina ai le tagata lea na aveesea faamalosi mai ai oloa, a itiiti mai e 24 itula, a o lumanai ai le suesuega o le talosaga, le taimi ma le nofoaga o lea suesuega.

**52. Puipuiga o nisi o oloa ua taofia i lalo o le fuaiupu**

**48-**(1) Afai o oloa o lo o taofia o se vaa, taavale po o se manu vaefa e tusa ai ma le fuaiupu 48, e mafai e le tagata ofisa faatagaina ona tuuina atu ia oloa i le puipuiga a le o:

- (a) le tagata lea na aveesea faamalosiā mai ai oloa; po o
- (b) so o se isi lava tagata ua faatagaina e le tagata ofisa faatagaina ma o ia lea ua ia malie e na te puipuia.

(2) E ao i so o se tagata o ia lea ua ia puipuia oloa i lalo o le faafuaiupu (1), seia vagana ai ua faia se faaiuga mausali i lalo o le fuaiupu 48 pe toe faafoi ia oloa pe leai foi, ia umia oloa i lana puipuiga e aunoa ma se tau faaee atu i le Malo o Samoa, ma ia tusa ai ma so o se tuutuuga talafeagai lea e mafai ona faaee atu e le tagata ofisa faatagaina.

(3) E ao i se tagata lea o lo o faasino i ai le faafuaiupu (2) ona ia:

- (a) toe faaavanoaina atu oloa i se tagata ofisa faatagaina i luga o se talosaga; ma
- (b) aua nei suia pe faamatuuina atu pe aveesea oloa mai Samoa seia vagana ai ua faatagaina le tagata e faia faapea e le tagata ofisa faatagaina; ma
- (c) toe faafoi atu oloa ia e manaomia i le puipuiga a le tagata ofisa faatagaina.

**53. Soligatulafono e faasino i nisi oloa ua taofia-**(1) Ua

faia e se tagata se soligatulafono o ia lea:

- (a) ua i lalo o lana puipuiga oloa e tusa ai ma le fuaiupu 52(1), ma ua ia faia se gaoioiga ua lē usitaia ai so o se manaoga o, po o ua faaee atu e tusa ai ma le fuaiupu 52(2) po o le (3); po o
- (b) ua ia ave pe aveesea po o le faaliliuina ma faaaogāina i se isi faiga e ese ai e ia lava ni oloa o lo o faasino i ai le fuaiupu 52(2) ma le (3), e aunoa ma se faatagaga a le tagata ofisa faatagaina.

(2) E noatia se tagata ua faamaonia faaletulafono i se soligatulafono i lalo o le faafuaiupu (1) i se sala tupe e lē silia le 500 iunite tau faasalaga, po o le nofosala i le falepuipui mo se vaitaimi e lē silia le lima (5) tausaga, po o faasalaga uma e lua.

**VAEGA VIII  
NOATAGA TAU SOLITULAFONO**

**54. Faaaogāina o le Vaega V o le Tulafono o Solitulafono 2013** - E tatau ona faaaogāina le Vaega V o le Tulafono o Solitulafono 2013 i lenei Tulafono.

**55. Noataga o se kamupani-**(1) O lenei Tulafono e faaaogā i se kamupani i le tulaga lava e tasi e pei ona faaaogā i tagata taitoatasi, ma e mafai ona faamaonia le nofosala o se kamupani i so o se soligatulafono ua faatulaga mai i lenei Tulafono, e faaopoopo atu i le noataga o so o se tagata mo le soligatulafono lava lea.

(2) Mo se soligatulafono ua faia i lalo o lenei Tulafono, o le amio po o le tulaga o le mafaufau o se tagata faigaluega, sui sooupu po o se tagata ofisa o se kamupani ua faatatauina lava i le kamupani pe afai o lea tagata o lo o galue:

- (a) i le aotelega o lana galuega; po o
- (b) i le aotelega o lana pule faataga moni po o le pule faataga faamaonia; po o
- (c) e faatasi ai ma le maliega po o le ioega (manino po o le faatatauina i ai) a se faatonu, tagata faigaluega po o sui sooupu a le kamupani, ma o le tuuina atu o lea maliega o lo o aofia i le pule faataga moni ma manino a le faatonu, tagata faigaluega po o se sui sooupu.

(3) I totonu o lenei fuaiupu, “o le tulaga o le mafaufau” e aofia ai le atamai, faamoemoega, manatu faaalua, talitonuga po o le naunautaiga ma mafuaaga a le tagata mo lea faamoemoe, manatu faaalua, talitonuga po o faamoemoega.

**VAEGA IX  
PUEINA FAAPAGOTA MA LE TOE FAAFOI ATU  
O TERORISI UA MASALOMIA MAI ATUNUU I FAFO**

**56. Faaaogāina o lenei Vaega** - O lenei Vaega e faaaogāina e avea o se tuusaunoaga i le Tulafono o le Aumaia po o le Tuueseina Atu o Tagata Solitulafono 1974, po o so o se isi lava Tulafono po o tulafono.



**57. Pueina faapagota ma le toe faafoi atu o se tagatanuu mai fafo ua masalomia-**(1) Afai ua masalomia e se leoleo i luga o mafuaaga talafeagai:

(a) e faapea o lo o manaomia se tagatanuu mai fafo e se Atunuu o Malo o le Taupulega po o se Atunuu i Fafu e tulai i se moliaga po o ni moliaga i lea atunuu e faatatau i se gaoioiga faaterorisi; po o

(b) e faapea ua soona fealuai solo faasolitulafono se tagatanuu mai fafo i le maea ai ona faamaonia o ona moliaga mo le faia o se gaoioiga faaterorisi, e mafai e le leoleo, e ala i le faaaogāina o le malosi talafeagai ai ona pueina faapagota le tagata e aunoa ma se faiga faatuai e lē tatau ai, ma tuuina mai loa lea tagata i luma o le Faamasinoga Sili.

(2) I totonu o lenei Vaega, “gaoioiga faaterorisi” e aofia ai so o se soligatulafono ua aiaia i lalo o lenei Tulafono po o se soligatulafono ua fuafuaina e le Faamasinoga Sili e tutusa ma so o se isi soligatulafono ua aiaia i lalo o lenei Tulafono.

(3) Afai ua faamalieina le Faamasinoga e faapea:

(a) e lē faaaogāina le fuaiupu 6 o le Tulafono o le Aumaia po o le Tuueseina Atu o Tagata Solitulafono 1974; ma

(b) o lo o i ai faamatalaga molimau talafeagai i le Faamasinoga e faapea, e tatau ona tulai lea tagata mo lona faamasinoga mo le faia o se gaoioiga faaterorisi po o, ua soona fealuai faasolitulafono ina ua tuanai ona faamaonia faaletulafono mo le faia o se gaoioiga faaterorisi,

e ao i le Faamasinoga ona poloaia e faapea, ia faatumau ai i lalo o puipuiga ma ia toe faafoi i se atunuu o Malo o le Taupulega po o le atunuu i fafo i le faamoemoe e tuuina atu le tagata i le faamasinoga mo le faia o se gaoioiga faaterorisi, po o le toe faafoi i le atunuu o Malo o le Taupulega po o le atunuu i fafo i le faamoemoe ina ia toe puipuia le tagata ina ua tuanai ona faamaonia faaletulafono mo le faia ai o se gaoioiga faaterorisi, po o le a lava le tulaga e i ai.

**58. Noataga e toe faafoi atu ai po o le molia faaletulafono-**(1) Afai ua teena e le Minisita e nafa ma Faamasinoga se talosaga mai se isi atunuu e aumai ai pe tuueseina atu se tagata i lalo o le Tulafono o le Aumaia po o le Tuueseina Atu o Tagata Solitulafono 1974, ma o lea talosaga e faasino i se soligatulafono tau solitulafono ua faia i lalo o lenei Tulafono, e ao i le Minisita e nafa ma Faamasinoga ona tuuina atu le mataupu i le Loia Sili mo le faamoemoe o le mafai ona faia o moliaga faaletulafono.

(2) Afai e leai se moliaga faaletulafono e faia mulimuli ane, e ao ona toe faafoi atu loa lena tagata.

## **VAEGA X PULEAGA FAA-FAAMASINOVA**

**59. Puleaga faa-faamasinoga** - I le avea ai ma tuusaunoaga i so o se isi lava Tulafono po o tulafono, e i ai le puleaga faa-faamasinoga a le Faamasinoga Sili e fofoga ai ma faia le faaiuga o so o se mataupu i lalo o lenei Tulafono:

(a) pe afai o le gaoioiga ua faia pe leai foi po o le soligatulafono -

(i) na faia i totonu o Samoa; po o

(ii) na faia i luga o se vaa po o se vaalele ua faamauiina i Samoa; po o

(iii) na faia e se tagata o ia lea o lo o, po o nofomau i totonu o Samoa, po o se tagatanuu o Samoa; ma

(b) e tusa lava pe na faia le gaoioiga pe leai foi lea ua tuufaatasia ai le soligatulafono na faia i totonu po o fafo atu o Samoa, pe afai o le gaoioiga na faia pe leai foi -

(i) ua faia e se tagatanuu o Samoa po o se tagatanuu o so o se atunuu o ia lea e masani ona nofomau i Samoa; po o

(ii) ua faia ina ia faamalosi ai le Malo ina ia faia po o le aloese mai le faia o so o se gaoioiga; po o

(iii) ua faia faasaga i se tagatanuu o Samoa; po o

(iv) ua faia e se tagata o ia lea, i le maea ai o le faiga o le solitulafono, o lo o i totonu o Samoa.

**60. Maliega a le Loia Sili-**(1) O tualumaga mo so o se soligatulafono ua faia i lalo o lenei Tulafono, lea o lo o talosagaina ai le puleaga faa-faamasinoga i lalo o le fuaiupu 59(a)(ii), mo se soligatulafono ua faia i luga o se vaalele, so o se isi nofoaga na i lo totonu po o luga ae o Samoa, po o mo so o se isi lava soligatulafono ua faia i fafo atu o Samoa, e faatoa mafai ona faia pe afai e i ai faatasi ma le maliega a le Loia Sili.

(2) E lē mafai e le faafuaiupu (1) ona puipuia mai ai le pueina faapagota, po o le tuuina atu o se tusi faapoloaiga mo le pueina faapagota o so o se tagata mo so o se soligatulafono, po o le taofia i lalo o le puipuiga po o, le tatala i tua i luga o se puipuiga o so o se tagata ua molia i so o se soligatulafono.

## VAEGA XI AIAIGA ESEESE

**61. Malosiaga e faavaeina ai se Komiti** - E mafai e le Kapeneta ona faavaeina se Komiti mo faamoemoega o lenei Tulafono.

**62. Tulafono Faatonutonu-**(1) E mafai e Le Ao o le Malo, i le faia i luga o le fautuaga a le Kapeneta, ona faia tulafono faatonutonu e aloaia ai aiaiga o, po o mo faamoemoega o lenei Tulafono.

(2) E aunoa ma le faatapulaaina o le faafuaiupu (1), e mafai ona faia tulafono faatonutonu:

(a) e aiaia ai le tulaga faasui, tofiga, galuega tauave, tiute ma malosiaga o se Komiti ua faavaeina i lalo o lenei Tulafono ma so o se isi lava mataupu e talafeagai i le galuega a le Komiti;

(b) ia aiaia ai se taiala faavae e faafaigofie ai le tuuina atu o fesoasoani faava o malo i ma, mai Samoa, i le tulaga o se gaoioiga faaterorisi po o se faalavelave o tupu faafuasei;

- (c) ia faatonuina ai so o se mataupu e manaomia le faatonuina i lalo o lenei Tulafono;
- (d) ia teuteuina ai le Faamatalaga 1.

**63. Soloia, soloaiga ma aiaiga faasaoia-**(1) Ua soloia le Tulafono o le Puipuia ma le Taofiofia o Faiga Faatupu Faalavelave 2002 (“Tulafono ua soloia”).

(2) O se faasinomaga i tulafono (e ese ai na i lo lenei Tulafono), po o se pepa aloaia po o se gaoioiga o le pule faataga i le Tulafono ua soloia, ua faatatauina lava, o se faasinomaga i lenei Tulafono seia vagana ai pe afai ua manaomia i le mataupu se isi uiga e ese ai.

(3) O moliaga faaetutulafono uma ma isi mataupu e tulai mai i, po o lalo o le Tulafono ua soloia ia e le i faia i ai ni faaiuga pe tagofia i se isi faiga e ese ai i lalo o lea Tulafono i le aso e amata faamamaluina ai lenei Tulafono, e faaaauau pea ma e ao ona faia i ai le faaiuga po o le tagofia i se isi faiga e ese ai i lalo o lenei Tulafono.

(4) E faaaauau pea taualumaga faaetutulafono uma na faia i lalo o le Tulafono ua soloia i le aso tonu na amata faamamaluina ai lenei Tulafono, e faapei ai na faia po o ua faatatauina ina ia tusa ai ma lenei Tulafono.

(5) O se gaoioiga o le pule faataga ua faia po o, ua tuuina atu i lalo o le Tulafono ua soloia e tusa ai ma le tulaga e oo i ai lona aloaia po o lona faamamaluina i le aso e amata faamamaluina ai lenei Tulafono, e faaaauau pea le aloaia i lalo o lenei Tulafono seia oo ina muta lona aogā po o ua suia, teuteuina po o ua faalēaogāina.

**64. Teuteuga faatupulaia-**(1) Ua teuteuina le Tulafono o Vaalele Sivili 1998:

- (a) i totonu o le fuaiupu 2 -
  - (i) i le tuanai ai o le faamatalaina o le uiga o le upu “Feagaiga” ia faaofi e faapea:

““atunuu tau feagaiga” o lona uiga, mo le faamoemoega o lenei Tulafono, o so o se atunuu lea e avea ma Malo Auai o le Feagaiga i Tokyo;

“taitai pailate” o lona uiga o le tagata o ia lea o lo o taitaia ma faatonutonuina le vaalele;” ma

(ii) i le tuanai ai o le faamatalaina o le uiga o le “Tusi Resitala o Vaalele a Samoa” ia faaofi e faapea:

““vaalele faatonutonuina a Samoa” o lona uiga o se vaalele ua faamauina i Samoa;” ma

(b) i le fuaiupu 28, mo le faaupuga “Leoleo a Samoa” ia suia e faapea “Galuega Tau Leoleo a Samoa”; ma

(c) i le fuaiupu 72 ma le 110(3) mo upu “Leoleo o Samoa” ia suia e faapea “Galuega Tau Leoleo a Samoa”; ma

(d) i le fuaiupu 79(1)(a), mo “Fuaiupu 105, 106, 107 ma le 112” ia suia e faapea “Fuaiupu 107 ma le 112”; ma

(e) ua soloia fuaiupu 105, 106, 108(1) ma le 110(1); ma

(f) i le fuaiupu 108(3), ia aveese upu “aiaiga o le faafuaiupu (1) po o”; ma

(g) i le fuaiupu 109, ia aveesea le faaupuga “le solitulafono o le ave faamalosia o se vaalele po o” i so o se mea o aliali mai ai; ma

(h) i le fuaiupu 110 -

(i) mo le faaulutala o le fuaiupu “Faaaogāina o fuaiupu 105, 106 ma le 107” ia suia i upu “Faaaogāina o le fuaiupu 107”; ma

(ii) ia aveesea le faafuaiupu (1); ma

(iii) i le faafuaiupu (3), ia aveesea le faaupuga “le fuaiupu 105 po o le fuaiupu 106 po o”; ma

(i) i le fuaiupu 111, ia aveesea upu “i le solitulafono o le ave faamalosia o se vaalele po o” ma upu “se solitulafono e pei ona faasinomia i ai le fuaiupu

106 o lenei Tulafono ua faia i sootaga ma le solitulafono o le ave faamalosiā o se vaalele”;  
ma

(j) i le fuaiupu 113(1), 114(1)(b), (c) ma le (3), 116(5)(a) ma le (b), ma le 117(1) ma le (2), mo le faaupuga “sui o Leoleo o Samoa” ia suia i upu “sui ua faatautoina o le Galuega Tau Leoleo a Samoa”;  
ma

(k) i le fuaiupu 116 -

(i) i le faafuaiupu (6), mo le faaupuga “(i lona i ai i Samoa, o se sui o Leoleo o Samoa)” ia suia e faapea “(i lona i ai i Samoa, o se sui ua faatautoina o le Galuega Tau Leoleo a Samoa, ma le ofisa talafeagai faava o malo po o se ofisa konesula o le atunuu o le tagatanuu o lea tagata)”;

(ii) mo le faafuaiupu (7), ia suia e faapea:

“(7) Afai ua faamoemoe le taitai pailate e faaoo atu so o se tagata e tusa ai ma le faafuaiupu (5), e ao ia te ia, i luma mai po o i se taimi vave e mafai ai ina ua maea ona tulauleele le vaalele, ona tuuina atu se faasilasilaga e tusa ai ma lona faamoemoe faatasi ai ma ni mafuaaga o lona faamoemoe -

(i) afai o le atunuu o Samoa, ia tuuina atu i se sui ua faatautoina o le Galuega Tau Leoleo a Samoa, po o se tagata ofisa o femalagaaiga po o, mo so o se isi lava atunuu, ia tuuina atu i se tagata ofisa o ana galuega tauave e tutusa ma galuega tauave a se leoleo po o se tagata ofisa o femalagaaiga i totonu o Samoa; ma

(ii) i so o se tulaga ua taua, ia tuuina atu i le ofisa talafeagai faava o malo po o le ofisa konesula o le atunuu o le tagatanuu o lea tagata.”;

(iii) mo le faafuaiupu (8), ia suia e faapea:

“(8) Ua faia se soligatulafono e se taitai pailate o se vaalele o ia lea, e aunoa ma se mafuaaga talafeagai ua ia lē usitaia manaoga o lenei fuaiupu, ma e noatia i luga o moliaga ua faamaonia faaletulafono i se sala tupe e lē silia le 100 iunite tau faasalaga.”; ma

(iv) i le faafuaiupu (9), ia aveese upu “i le va o tagata”; ma

(l) i le fuaiupu 116A(b), mo le “116(c), (d) po o le (e)” ia suia i le “116”; ma

(m) i le fuaiupu 119, ia aveese “le fuaiupu 105 po o le fuaiupu 106 po o”.

(2) Ua teuteuina le Tulafono o Tupe Maua Mai i Soligatulafono 2007 e faapea:

(a) i totonu o le fuaiupu 2, i le tuanai ai o le fuaitau ma le faamatalaina o “meatotino ua afaina”, ia faaofi e faapea:

““gaoioiga faaterorisi” e i ai lona uiga tutusa i le Tulafono e Taofia ai Faiga Faaterorisi 2014;

“meatotino faaterorisi” e i ai lona uiga tutusa i le Tulafono e Taofia ai Faiga Faaterorisi 2014;”;

(b) i totonu o le fuaiupu 6(1), i le tuanai ai o upu “soligatulafono ogaoga” ia faaofi upu “po o gaoioiga faaterorisi”;

(c) i totonu o le fuaiupu 7(1) -

(i) i le faaiuga o le parakalafa (c), ia aveese le faailoga piriota ma suia i se semi kolona;

(ii) i le tuanai ai o le parakalafa (c), ia faaofi e faapea:

“(d) se meatotino faaterorisi.”;

- (d) i totonu o le fuaiupu 19(1), i le tuanai ai o upu “ua faamaonia ai se moliaga o se tagata” ia faaofi upu “po o meatotino faaterorisi”;
- (e) i totonu o le fuaiupu 46(3)(e), i le tuanai ai o upu “o lo o ia umia” faaofi upu “po o vaavaaia”;
- (f) i totonu o le fuaiupu 48(1)(c), i le tuanai ai o upu “soligatulafono ogaoga” ia faaofi upu “po o gaioioiga faaterorisi”;
- (g) i totonu o le fuaiupu 74(2)(b), i le tuanai ai o upu “e faia ai” ia faaofi upu “se gaioioiga faaterorisi po o”; ma
- (h) i totonu o le fuaiupu 86, ia toe faanumera le aiaiga o i ai nei e avea ma faafuaiupu (1) ma faaofi se faafuaiupu (2) fou e faapea:

“(2) E mafai ona faia Tulafono Faatonutonu i lalo o lenei fuaiupu ina ia aiaia ai mo nisi taualumaga po o isi mataupu e faasino i poloaiga e aveesea ma faoa faamalosi ai po o isi poloaiga ma mataupu e fesootai i ai, e uiga i meatotino faaterorisi.”.



**FAAMATALAGA 1  
(Fuaiupu 2 ma le 62)**

**FEAGAIGA E TAOFIA AI FAIGA FAATERORISI**

- 1 Feagaiga e uiga i Soligatulafono ma Nisi Lava Gaoioiga ua faia i luga o Vaalele na faia ma sainia i Tokyo i le aso 14 o Setema 1963.
- 2 Feagaiga mo le Taofiofia o le Aveesea Faamalosa Faasolitulafono o Vaalele na sainia i le Hague i le aso 16 o Tesema 1970, ma le Maliega Faa-Feagaiga Faaopoopo 2010 i le Feagaiga mo le Taofiofia o Vaalele Solitulafono.
- 3 Feagaiga mo le Taofiofia o Gaoioiga Faasolitulafono faasaga i le Saogalemu o Vaalele Sivili, na faia i Montreal i le aso 23 o Setema 1971.
- 4 Maliega Faa-Feagaiga i le Puipuiga ma le Faasalaina o Solitulafono Faasaga i Tagata o lo o Puipuia Faava o Malo, e aofia ai Soupu Faava o Malo na faia e le Fono Aoao a Malo Afaatasi i le aso 14 o Tesema 1973.
- 5 Feagaiga Faava o Malo faasaga i le Ave Faamalosi o Tagata, na faia e le Fono Aoao a Malo Afaatasi i le aso 17 o Tesema 1979.
- 6 Feagaiga e uiga i le Puipuiga Faatino o Meafaitino Tau Niukilia, na faia i Vienna ma Niu Ioka i le aso 3 o Mati 1980, ma Teuteuga i le Feagaiga Faava o Malo i le puipuiga o meafaitino tau niukilia na faia i le Fono e uiga i le Puipuiga o Meafaitino Tau Niukilia i le aso 8 o Iulai 2005.
- 7 Maliega Faa-Feagaiga mo le Taofiofia o Gaoioiga Faasolitulafono o le Faatupu Vevesi i Malae Vaalele e Tuuina atu Auaunaga Faava o Malo o Vaalele Sivili, faaopoopoga i le Feagaiga mo le Taofiofia o Gaoioiga Faasolitulafono faasaga i le Tulaga Saogalemu o Vaalele Sivili, na faia i Montreal i le aso 24 o Fepuari 1988.

- 8 Feagaiga mo le Taofiofiga o Gaoioiga Faasolitulafono faasaga i le Saogalemu o Folauga i le Gataifale, na faia i Roma i le aso 10 o Mati 1988, ma le Maliega Faa-Feagaiga 2005 i le Feagaiga mo le Taofiofia o Gaoioiga Faasolitulafono faasaga i le Saogalemu o Folauga i le Gataifale.
  - 9 Maliega Faa-Feagaiga mo le Taofiofia o Gaoioiga Faasolitulafono faasaga i le Saogalemu o Fausaga Mautu o lo o i Eleele Lofia o le Atunuu, na faia i Roma i le aso 10 o Mati 1988, ma le Maliega Faa-Feagaiga 2005 i le Maliega mo le Taofiofia o Gaoioiga Faasolitulafono faasaga i le Saogalemu o Fausaga Mautu o lo o i Eleele Lofia o le Atunuu.
  - 10 Feagaiga e uiga i le Faailogaina o Pomu Palasitika Matautia mo Faamoemoega o le Faailoaina na faia i Montreal i le aso 1 o Mati 1991.
  - 11 Feagaiga Faava o Malo mo le Taofiofia o le Faapapaina o Pomu e Terorisi na faia e le Fono Aoao a Malo Afaatasi i le aso 15 o Tesema 1997.
  - 12 Feagaiga Faava o Malo mo le Taofiofia o le Faatupeina o Faiga Faaterorisi na faia e le Fono Aoao a Malo Afaatasi i le aso 9 o Tesema 1999.
  - 13 Feagaiga Faava o Malo mo le Taofiofia o Gaoioiga Faaterorisi o Meatau Faaniukilia na faia e le Fono Aoao a Malo Afaatasi i le aso 13 o Aperila 2005.
  - 14 Feagaiga o le 2010 i le Taofiofia o Gaoioiga Faasolitulafono e Faasino i Vaalele Faava o Malo.
-